



ITOPHPHE'I MARE'I SUUME

LOSAANCHI KITAABA

Baxxanchi Sooro

Diizaaynachchi:

* Siisaayi Taagassa

2011 H.D

Hosaanaa



Itophphe'i Federaalaam Demokirase'aam Irippabiiqqi Losa'n Ministeera

KITAABINA ISSAMCHI HASISOO AMAJJI EGE'LO'OO

Ka kitaaba lobakat losaan awwaaxxitam bikkina Ege'lo'nne amadimmi hasisookko. Awwanoo tommi tako'uw-wi kitaabom ege'lo'neege'lo'nne amadaka'a hinkide awwaaxximma xanakkamda'e sawwite uwwoohane.

- ◆ Kitaaphphi sheefana qoxxaal woraqatinne te'im laastiikinne sheefanimma.
- ◆ Kitaabooma aashi afoo beebeyyonne egerakka'a disimma.
- ◆ Kitaabooma xuraam anginne amajjaa idduwwam fooqaachcha urimma.
- ◆ Kitaaphphi sheefanam ihukko idduwwanne hasisoo bee misil kiisimmaa kitaabbimmaa urimma.
- ◆ Kitaaphphi ido annannaato (qanannaato usheexxakkam beyyo) qoxxaalli woraqata awwaaxximminne, afakko beyyo tiirimma bagaan idduwwa qinximmi hasisooyyo.
- ◆ Kitaaphphi woriinse mat idom ihukko misila gosimmi hasisooyyo.
- ◆ Kitaabi gosamuta'nem dabarakka'a amadiisimma.
- ◆ Kitaaba, kekkes woronne issakku'uuyya qinxi-qinxoo bee'isa egerimma.
- ◆ Kitaaba mulli maninna aggiisakko'lasm danaamisa amadoo'isa kurimma.
- ◆ Kitaabooma egerakka fooqaai'mma idduwi dereerantam beeisa ege'lo'inne amadimma.

FISSIIXA

Usheexxat Mato

Hagayye Higinsummisa ----- 2

Usheexxat Lamo

Annanni annanni Luwwi Keenaancho ----- 11

Usheexxat Saso

Ni Heechqaanqa ----- 23

Usheexxat Sooro

Uullanee Beyyi Summuwaa ----- 38

Usheexxat Onto

I Kobi'looma. ----- 45

Useexxat Loho

Sa'aat Mee'o? ----- 54

Usheexxat Lamara

Ichchi Doo'lo'o ----- 64

Usheexxat Sadeento

Qar Kollo annanni issimma. ----- 75

Usheexxat Honso

Tirafiiqqi Seera ----- 81

Usheexxat Tommo


Ege'lo'o ----- 88

Usheexxat Tommo Mato


Luwwi Baxamcha ----- 94

Usheexxat Tommo Lammo

Gaga La'isimma ----- 102



SHOOTO'AMMI ANGI QOCCUWWA




Qubbukki 2 xigo

Qinxuk Sh

Qinxuk Sh

Qubbukki 5



Fooccam anga

Kolli Kululleesa

Kolli Kululleesa

Z Qoocca




Buudo

Daaphphisaanch
Biddiqaakkoo
maxxaara

USHEEXXAT MATO

HAGAYYE HIGINSUMMISA



HAGAYYE + HIGISIMMI + NIIKKI
= HAGAYYE HIGINSUMMISA



LOSA'N BAXXANCHI MATO

Losixxi Mato

Moo'imminne Qanannaato

1. Awwonoo misila qoossitakka'a moo'lakka'a misiloomanne moo'lak-kam oos maha baxamolda'e losisaanchina kullehe. Caakkisakkeena hasakko'i sawwite caakkishshina hasisoo mare'e laqqakkam bee'an ihulas losisaanchi hara'mato xa'mehe.
2. Ki'nuwwik hagayyi higishshi hinka'i misilinne hincit yooda'e mash-ka'a bakkiisakka'a losisaanchina kullehe.



M I I S I L L I

LOSA'N BAXXANCHI LAMO

Losaan, “Hagayye higisummisa” losisaanchi qananaa’aku’uuyya sawwit aalakku’uuyyim, bakkinne mare’i suume awwaaxxakkamisa qoossitakka’a moo’lehe.

HAGAYYE HIGISUMMISA

Hagayye hinkid higinsumda’e xa’makko’aare qarxi beshshuwwi hundim ki’lu’uuyya aganna kuttamaare lobakata liiransam hee’ukko.

Deetaamii Abbo’oo hagayye higisamukkok lalleewwa allaachchinnette hee’ukko. La’l allaachchannem annanni lello lellamukkuyya ixxuwwi gaga cababaa’lam hee’lo’o. Diinat hurbaata itoobee’isa egettu’uuyya at-tooxxi li’inina issito’i yakite suume wonshita’a woccam hee’lo’o. Liiro’o injeeraa sarimma losso’ookko.

Faxuma odim buskuuta sarimma losso’ookko. Yoosefee Haanna’aa hagayye higisamukkok muuziiqqi muutaa Ingliizisaa losso’uuyya hee’ukko. Yooseef gitaara (diitta) lello’isa moo’issukkaare hundim lobakata maala’linaammo. Haanna’am pihaano’o danaamisa lellimma xanto’ookko. Saamu’eel hagayye higissukkok dadda’l minenne (suuqanne) annina daddarakkamisa hara’mukkuuyyatte hee’ukko.

Niqarxi woraadduwwi kibbami Larorii waatto’ok haxuullinsette. Eebikina hagayye higisso’ok harqootimminne, korchimminne, shuqunimminnee mk. anno’o hara’mitu’uuyya hee’lo’o. Niqarxi woronne hundiinse hoffi beetichchi Ergan hagayye higisukkisa aganna kurukkis suume wonshaatette hee’ukko. Ka lasage misila ki’isaanchi iheena hasoo bikkina hagayye higisukkisa misila ki’isimma losixxukkuuyyi ihubikkina misila ki’isu keeno bolxisinne moo’isukko.

I kor afaa summa weeshakko’aare lobakata tuurummo. Mashka’oomim an hagayye higisummok Fiitaaminnee Xummisinne maqire xulbe’e lellinummuuyyaa ni hegeegonne siidamo delbi woronne waachchinumuuyyatte hee’ukko. I qarxi beshshuwwina ku’leena xanoom luwwi

mahim hee'ukko. Kob'lishshina maaxamummuuyya delbi woronne waachchinummuuyyat hee'ukko. I'isa lelli xale'inne higisso'i beshshuw-wim hee'llo'o. Ni summi hundikim weeshamukkaare losaa'n illagenne filleena tuullaa qubbinnaa hee'nummo. Losisaanchi sogitano uwwakka'a lasonne kalasagina mulli keeniinse siindummi danaam losano aa'naa waaroo hagayye aalo'isa higinseena losaa'n illagenne sagara aangoom-misa issaakko.

Anim mixoommok hagayyi qaqqiso afaa sagara wonshaqqumta'nette. Ka aagummi sagara wonsheena lobakata gaaggabummi bikkina kabadinnem qoodo'o fissaqqoomulla.

Awwonoo xa'michchuwwa qanannaaxxi woronne lossakko'aannika mare'uwwi suume lossakkona gudaakkoohan ihubikkina qarxi woronne mare'i suum awwaaxxitakka'a dabachcha uwwehe.

1. Qanannaaxxi woriinse ki'nuwwina tashaa'oo mat xuunsammi woca qarxi beshshuw-wina qananaa'lehe.
2. Agannooma gundissakka'a ki'nuwwi gaqqi sawwixxisanne kullehe.
3. Agannooma onti xuunsammi wociinse lophphoo bee'aanninne gundissakka'a caakkissehe.
4. Ki'nuwwi aganna higisoo manchi ikkakkota'n waaroo hagayye hinkid higisakkamda'e qarxi beshshuw-wina caakkissehe.
5. Aganna ku'laanchoom hincaa'ukki beshshuw-wi woriinse hagayyooma e'laanchisinne hinki losaanchi higisuda'e mashka'innem caakkissehe.

Losixxi Lamo

ATOORACHCHA

Qanannaato shooto'i issimminne awwonoo xa'michchuwwa gaalchinne atoorattakka'a lasonne gaalchi iittamukki finto'i sawwite beshshuw-wina hincaa'lehe.

1. Aganna kurukki losaanchi hagayye higisukkis hinkidette hee'ukko?
2. Aganna kurukki losaanchi qarxi beshshuwwina aganna macceesisaa lasonne hagayye higishshanne macceesamu luwwi maruchcho?
3. Aganna kurukki losaanchi qarxi beshshuwwiinse losukki losaan maruchcho?
4. Losisaanchi aganna kurukki beetonne massakko'i murat maruchcho?
5. Waaroo hagayye e'laanchisa higiseena xanoo'isa aganna kurukki losaanchina sogitano uwwaakko.

Losixxi Saso


Awwonoo sagalluwwi mare'i suume bikkita'a yoo keeno. Ka mare'uw-wina waameet mare'uwwi ihookkoka losisaanchina moo'issehe.

1. Hagayye
2. Danaamo
3. Tuurimma
4. Baddimma
5. Losaancho

LOSA'N BAXXANCHI SASO

Losa'n baxxamchi matonnee lamonnee lossakko'i mare'i suume ki'nuwwi gaqqi sawwite caakkisakkeena awwaaxximma xa'michchi hundinam dabachcha uwwitakkamoki suu'm mare'innet ihukkisa sawwillehe.

Higu
ammane



Qeeraa'l
amma'n
illage



Losixxi Mato

Hagayye higissakko'isa qarxi beshshuwina caakkissehe. Agannoom awwonoo sawwittuwwa edimmi hasisa.

A. Issitakko'i baxo _____

B. Ee baxiinse lossakko'i losano. _____

Losixxi Lamo

Gaalchanne baxxantakka'a awwonoo horoor woshshanne fitammehe.

- ◆ **Gaalchi Mato:** Hagayyi agannuwwi awwaadoohane.
- ◆ **Gaalchi Lamo:** Hagayyi agannuwwi hawwodoohane.

LOSA'N BAXXANCHI SOORO

Mare'uwwi Finto'o



Hagayye

“ Hagaayyi”ka mare’i finto’o

A.	Mare’oo’m angi qoocca	K
B.	Mare’oo’m baxamoo beyyo	Ni illagenne ihaa
C.	Mare’oo’m angi oobbi duuha’a	Bii’l kollo
Ch.	Mare’oo’m mikmikaat	Wiliqixa
D.	Mare’oominne maqire maroo illi caakkishshaa orachchi mikmikaatoo	illikollo deemmaa

Losixxi Mato

Hanaan uwwamukki kobi’lishshinne ka usheexxatonne awwaaxxiinoommi mare’uwwiinse sas won won mare’uwwa doo’litakka’a awwonoo keeno qarxi beshshuwwina caakkissehe.

- A. mare’i suu’m angi qoocca
- B. Mare’oom usheexxoo beyyo
- C. Mare’oo’m angi oobbi duuha’a
- Ch. Mare’oo’m mikmikaato
- D. Mare’oominne maqire mattam illi caakkishshaa orachchi mikmikaa-too.

Losixxi Lamo

Losisaanchi “A” lokkaaganne yoo mare’uwwa moo’isakkamaare qoositakka’a moo’imminne “B” lokkaaganne shiinnaatoo caakkishsha amadukki maxxaa’l fidalcho moo’issehe

A

- 1 Bille
- 2 Xeena
- 3 libba
- 4 Qiida
- 5 Dirisa

B


- A Angi qoocci afare daba'laakko? H ette.
- B Angi qoocci xig ontotte
- C Baxamookkok miinennette
- Ch Mikmikaatoom makki kollii qeddi kollonnette
- D Angi oobbi qar gaal-gaalannette.

USHEEXXAT LAMO

ANNANNI ANNANNI LUWWA
KEENAANCHO



KEENIMMA



LOSA'N BAXXANCHI MATO

Losixxi Mato

MOO'IMMI QANANNAATO

1. Awwonoo misila qoossitakko'uuyya moo'lakka'a misilanne moo'lakkam keenaxxi muuxxi woriinse laqqakkam keenaxxi mu'uttuwaa uwwitam awwaadoo losisaanchina kullehe. Kuttakeena hassakko'i sawwite caakkishshina hasisoo mare'e laqqakkam bee'an ihulase losisaanchiinse harammato xa'mehe.
2. Misilanne moo'lakkam keenaxxi mu'uttuwwiinse mee'ooma aw-waaxxitakka'a laqqakkamo?
3. Keenatinne maqire amaxxamukee'nekka mare'uwwa losisaanchina moo'issehe.



Losa'n Baxxanchi Lamo

Losisaanchi “keenaanchi muuta” yoo qanannaato qananaa'lakku'uuyya sawwite caakkishshina issitam yakixxi midaadinne mare'e awwaaxxita-misa qoossitakka'a moo'lehe.

KEENAXXI MU'UTTUUWA

Hundem luchchim gaqqan ihaakkoo keenaanchuwii qaxooma caak-kisaan yoohane. Mat luwwina qaxooma keenaanchi hundem luwwik-kam qaxooma keeneena xanooyyo. Mat luwwa hanqo'i keenaanchinne keenakko'ibeelas mishoom huushammat ihookko.

Hanqo'i qaxoo'm keenaancho awwaaxxinumbeelasem keenaanchoom caakkooyyo. Kobi'lishshina I uullichchi mat kiilogiraama te'im an lam-iyyi meetira guuroommo yamamooyyo. Uullichcha keenneena meetira awwaxxinoommo. Mishaamooma xiginne amaxansinaa hofte'u kol-lo saantiimeetirinne hicaa'noomo. Kb. I uullichchina mat meetira; mat meetiraa lamiyyi saantimeetiraa; mat meetiraa kollo mk. yinummuuyya woncoommo. Meetir, qee'looma keenimmina awwaadookko. Qee'loom, mat kum meetirii

hanaan ihulase Kilomeetirinne awwaaxxinoommo.


Mashka'oomim mat kum meetir mat kiilomeetirinne gudaancho.

Eebikkina ni miniinse losa'n min
afebe'e yoo hiixxe'oom

onti kum meetir ihulas onti kiilo meetira
yinaa

woncoommo. Ni guurato keenneena
keenaancho

awwaaxxinoommo. Mishaame kiilogi-
raaminne woncoommo.



MISIL 3



Misil 4

Hanqo'i meeti'lisam, mat luchchika guurato giraaminne wocimmi xansiisookko. Mat kum giraam mat kiilo giraama. Neese hinkaa'na kee'minoomda'e keenaanchinne keenna lasage tommoo onti kiilograama guuroommo; lamiyyi kiiloo giraama mk. yinaa woncoommo

Dunamoo luwwa keenimmina liitira awwaaxxinoommo. Mishoomame liitirinne wocoommo. Mat kum liitirii hanane ihulase gaaloona yamamookko. Mat kum liitirii mat gudaancho. Iibbi qaxoom keenimmina termoo meetira awwaaxxinoommo. Mishooma caakkinsoommok digirii faaraniyit te'im saantigireedinnete; kb. Mat beero'i iibbi qaxoom sad digirii faaranaayit te'im sad digirii santigireeda; sadee lam santii gireedaa mk. yinaa woncoommo.



MISIL 5

Losixxi Mato

Qanannaaxxisinne awwonoo xa'michchuwwa daballehe. Hundem xa'michchikim dabachchi daba'lookkok mare'i suuminne ihukkisa tiillehe.

1. Qanannaaxxi woronne qanxaa'akko'i keenaxxi muuxxi hagalluwaa keenaxxi caakkishshaa kullehe.
2. Ni guurato keennoommok mahinne?
3. Ni uullichcha keennaancho keennumta'n hanqo'i misha siideena xannoom bee'ek mahina?
4. Qanannaaxxi woronne moo'anto'i keenaxxi muuxxi hagariinse mulleka laqqakkam luwwi yoolase qarxi beshshuwina kullehe.
5. Keenaxxi awwaado caakkissehe.

Losixxi Lamo

Losaan, gaassitakka'a awwonoo sagalluwwa bikkamoo mare'i suummuwwa losisaanchi moo'isakkamoka onsimminne awwonnehe. Eelasage keenaxxi muuxxi mare'uwwa, qaxooma caakkisoo mare'uwwinne shiinnaatissehe.

Keenaxxi mu'uttuwwa	Qaxooma caakkisaano
1 Meetira	A Kiillogiraama
2 keenaancho	B Santii gireeda
3 Liitira	C Meetira
4 Termoommeetira	D Leetira

Losixxi Mato

Qanannaaxxisinne awwonoo xa'michchuwwa daballehe. Hundem xa'michchikim dabachchi daba'lookkok mare'i suuminne ihukkisa tiillehe.

1. Qanannaaxxi woronne qanxaa'akko'i keenaxxi muuxxi hagalluw-waa keenaxxi caakkishshaa kullehe.
2. 2 Ni guurato keennoommok mahinne?
3. Ni uullichcha keennaancho keenumta'n hanqo'i misha siideena xannoom bee'ek mahina?
4. Qanannaaxxi woronne moo'anto'i keenaxxi muuxxi hagariinse mulleka laqqakkam luwwi yoolase qarxi beshshuwwina kullehe.
5. Keenaxxi awwaado caakkissehe.

Losixxi Lamo

Losaan, gaassitakka'a awwonoo sagalluwwa bikkamoo mare'i suummuwwa losisaanchi moo'isakkamoka onsimminne awwonnehe. Eelasage keenaxxi muuxxi mare'uwwa, qaxooma caakkisoo mare'uwwinne shiinnaatissehe.

Keenaxxi mu'uttuwwa

- 1 Meetira
- 2 keenaancho
- 3 Liitira
- 4 Termoommeetira

Qaxooma caakkisaano

- A Kiiloogiraama
- B Santii gireeda
- C Meetira
- Ch Leetira

LOSA'N BAXXANCHI SASO



MISIL 6

Losixxi Mato

XUUNSAMMI WOC BAXIMMA

Misila moo'lakkam lamem Oos Lonso'oo Annuulloo yamamtamo. Ixx-uwwi sawwite dabasaqamcha qananaa'lakeena gaassitakka'a misila moo'lakku'uuyya ixuwwi uullichchaa guuratoo akeekamsitakkuu soorii shiqoo matr'uwwa amadoo onti xunsamwoca baxxehe.

LOSA'N BAXXANCHI SOORO



Lonso'o

Annuulli

MISIL 6

Kaba odim losisaanchi, Lonso'okaa Annuullikaa sawwite uw-waqamchi mare'i suuminne qananaa'akku'uuyya moo'lehe.

Lonso'o: Anuullo, ki uulichchaa guurattoo keenantaa laqqoo?

Annuulli: Eeyya, amman ammanenne Iyanni maqirem ni olla'anne yoo qaraa'l mine marumuuyya keenamoommo.

Lonso'o: Qaraa'l minee! Uulichchaa guurattoo keenamakkamoki qaraa'l minennennihe?

Annuulli: uulichchaa guurattoo hannonnem keenanchi xanamookko ihukkaarem lobakat qaraa'l minneewwi doollab meet-irii keenaanchi yoobikkina qaraa'l minneewwanne yoo keenaanchuwwi amma'nisoo e'laanchi ihubikkina Iyanni qaraa'l minneewwanne awwaaxximma doo'lookko.

Lonso'o: an ihukkaarem uullichcha keenamoommok eddechcha gobbam iyyummi meetirinnette. Guurato keensiixxoommok odim gooqqi shiienne onti saantima miqumuuyyatte.

Annuuli: ki uullichchi mee'i meetirahe?

Lonso'o: Mat meetiraa lamiyyi saantii meetiraa.

Annuulli: Ati iinnii uullichcha qeeraa'latte yimma. Iikki mat meetiraa tommoo onti saantii meetira guurat odim tommoo lamar kiiloogiraama.

Lonso'o: At guuratinne iinnii lophphitootto. Iikki tommo soori kii-lo'oo onti xibbi giraamaa.

Losixxi Mato

Awwonoo mare'i suume qarxi beshshuwwi illagenne caakkissehe..

1. Lonso'oo Annuullii mah bikkina atooratto'o?
2. Ki'nuwwim guuratoo uullichchaa keenantakkamo?

Losixxi Lamo

Losisaanchi awwonoo xa'michchuwwa mare'i suuminne qananaa'aku'uuyya onsimminne moo'lakka'a losonne "Hanqa" te'im "Qophphano" yoo mare 'e awwaaxxitakku'uuyya daballehe.

1. Lonso'o Annuullinse qeeraa'litamo.
2. Lonso'okii Annuullikii guurat guudaancho.
3. Annuulli Lonso'oonse guuratonne hoffe'ookko.
4. Lonso'o Annuullinse kolli meetirinne lophphitamoo.
5. Lonso'oo Annuullii kuurato keensiixxamookkok mat beyyonnette.

Losixxi Saso

Losisaanchi, awwonoo sagalluwwi bikkoo mare'uwwa moo'isakkamare onsimminne moo'lakka'a lasage ee mare'uwwina gereero'i mare'uwwa qarxi woronne moo'issehe.

- | | | | |
|---|------------|---|-------------|
| 1 | kee'maalla | 4 | qeeraa'la |
| 2 | wica | 5 | lophphookko |
| 3 | haraara | | |

LOSA'N BAXXANCHI ONTO


BAXINNE MOO'ISHSHI LOSANO

1. Lam lam ikkukka'a hanaan uwwamukki kobi'lishshisinne gaqqi guuratoo uullichchaa xa'mammehe. Eelasage ki'nuwwa atoorachchi misha losisaanchina hincaa'lehe.
2. Losisaanchi eebakko'i meetirinnee keenanchinnee uullichchaa guuratoo keentakka'a lasage, illagenne suuminne uwwamukki naqaashinne moo'isansitakka'a hanqooma qoossehe. Naqaashoom lab-aqqamoo bee'an ihulas mashka'ooma qoossitakka'a losisaanchina hincaa'lehe.

Losa'n Baxxanchi Loho

AKEEKANSIMMA





MISIL 8

Losixxi Mato

1. Gaassitakka'a akeekanteena xantam misilluwwa hassakka'a matooma "A" mulleka "B" awwonookkoka "C" "Ch" mk yitakku'uuyya summa uwwehe.
2. Akeeqqamchi mare'uwwa awwaaxximminne "A" "B" yitakka'a summa uwwitakko'i misilluwwa akeekkansitakku'uuyya qarxi beshshuwwina caakkissehe.

Losixxi Lamo

Ki'nuwwi qarxi woronnee qarxii biirannee akeekkanteena xantam luwwa hassehe. Awwontakka'ahim akeekkansi'mmina makkoo mare'uwwa awwaaxximminne siiddakko'i luwwa akeekkansitakku'uuyya lam-lam xuunsammi woca losisaanchina woccehe.

(Kb: ni qarxi fu le'i ni qarxi xufiinse xuqqookko, Ni baxxanchi xufi ni baxxanchi fule'iinse haraarookko.)

LOSA'N BAXXANCHI LAMARA

MARE'UWWI FINTO'O

Losisaanchinne maqire ikkakka'a ka usheexxat woronne lossakko'aanniinse illi mare'uwwa fintehe.




KEENATO

“keenaxxi” mare'e finto'o


- | | | | |
|-----|---|-------|---|
| A. | Mare'oo'm angi qoocci | | A |
| B. | Mare'oom baxamoo beyyo | | ni biqaannonne illagenne |
| C. | mare'oo'm angi oobbi duuha'a | | bii'l kollonne |
| Ch. | Mare'oo'm angi oobbi kolli | | qeddii-makkii woro'l kollonne |
| E. | Mare'oominne maqire mattam illi caakkishshaa orachchi mikmik-kaatoo | | iimaakkoo cekkinnee xishshak-ka'a moo'imminne . |

USHEEXXAT SASO

NI HEECHQAANQA



Qaanqa + Niikki = Ni heechqaanqa



Losa'n Baxxanchi Mato

MOO'IMMI QANANNAATO

Losixxi Mato

1. Awwonoo misila qoossitakka'a moo'lakka'a misiloomanne moo'lak-kam heechqaanqa moo'isoo luwwi woriinse laqqakkam qaanqa moo'isoo luwwa hinkanni giichcho caakkisoochanda'e qarxi beshshuwwina caakkissehe. Caakkisakkeena hassakko'i sawwite caak-kishshina hasisoo mare'e laqqakkam bee'an ihulas losisaancho xa'mehe.
2. Misilanne moo'lakkam heechqaanqa caakkisoo keeniinse ki'nuwwika te'im ki'nuwwi hegeeqqi heechqaanqa caakkisoo hinkan ihukkisa losisaanchina caakkissehe.
3. La'm misila onsimminne moo'lakka'a ki'nuwwina caakku qax asso losisaanchina caakkissehe.



Losa'n Baxxanchi Lamo

Losisaanchi “Itophphe’i mannik bolxisoo heechqaanqa” yoo qanannaato sawwite laqqeena issitam yakixxi bakkinnem mare’ooma awwaaxxakkamisa qoossitaka’a moo’lehe.

Itophphe’i mannik bolxisoo heechqaanqa Itophphe’i manni heeruullanne maala’lakkam maalalsiisoo heechqaanqi niinayoothane.

Kamashka’innem hiincho-hiinchoone dut bii’l uulli manni Itophphe’e daadeesseena waattamo. Ni uullim ka daadeesaanii lobakat kaakum bii’l uulli diinate (bira) siixxittamo.

Hundim Itophphe’i giir, giichchi minaadab gaqqan ihaakkoo heechqaanqi yoohane. Ku heechqaanqi wocaqqoo suuminne, aganninne, gat luwwinne, mateeyyoo’ m heechchinne, eddechchinne , ichchi sila’inne mk caakkookko.

Annichchi annichchi giir, giichchii minaadabii gaqqan ihaakkoo heechqaanqi yoohane. Exxaahim nees Itophphe’i minaadaphphisinnem hundem giichchoo minaadabaa maqiransoo mateeyyoo’ m heechqaanqi yoohane. Ku mateeyyoo’ m heechqaanqa lobakat doollii kidhooraa nimateeyyoomina shooto’uwwa.

Kakee’n Itophphe’i minaadab hundane ihaakkoo maqi’l heechqaanqi woronne mateeyyoominne xumma gariminne, iyyaqqamchi, lonsaqqamchi, lommanni amo’o lonsimmi, ta’ mamchi, mk niheechqaanqa kobi’lishshi issakka’a qaddaa’immi xansiisookko.

Heechqaanqi hundim awwaaddam keenoyyo. Mat mat hegeegonne jor heechqaanqa yamantam keen yo’o. Jora yamantam heechqaanqi woronne landa ballachchim, landi losano losoobee’isa hoorimmi, umur afoo’nem landa idootina uwwimmi, lamfoor amo’i fayya’oo’ m mine awwontambee’isa issimmaa, fayya’oo’ m xaaxxitenne maramaa qaramoobee’isa hoorimmaa mk. qaddamookko. Kido’ne’i heechqaanquwwa mateeyyanem bi’isimmi hasisookko.

Danaam heechqaaqa fuu'lisimmii waaroo qaranchina higinimmi annomat hunditaneme.

Losixxi Mato

Qanannaaxxisinne awwonoo xa'michchuwwa mare'i suume awwaaxximminne qarxi woronne daballehe.

1. Qanannaatiinse laqqakko'i illi sawwite baxxanchi beshshuwwina caakkissehe.
2. Itophphe'i minaadab hundina maqi'lan ihukki heechqaanquwwiinse sas kobi'lishsha qaddaa'e
3. 3 Bii'l uulli manni Itophphe'e daadeesso'uuyya ni uulli maha siixxitamda'e caakkissehe.
4. Laaphphaalli niheechqaanquwwa egerakka'a haareechchi qaranchina higinimmi annomat ayyan ihukkisa ki'nuwwi losisaanchina caakkissehe.

XUUNSAM WOC BAXO

Qanannaaxxi woronne yoo tirato shooto'i issimminne awwonoo sagalluwwa bikkoo mare'uwwi hanenne soorii hanaan ihoo mare'uwwa amadoo xuunsammi woca baxxehe.

1. giir giichcho
2. Heechqaanqa
3. gudo
4. bolxiso
5. hawwodoo

LOSA'N BAXXANCHI SASO

Losixxi Mato

Awwonoo xa'michchuwwa baxxanchi woronne mare'i suuminne "atoorallehe" losamukkisam atoorachchi horoor woshshi mare'uwwi awwaaxximmi xanat fuu'lisimmi ihukkisa sawwillehe.

1. Hundim ki'nuwwi giichchika te'im hee'lakkam hegeeqqi heechqaanqa qarxi beshina kullehe.
2. Ki'nuwwi giichchonne te'im hegeegonne losamukki heechqaanq woronne awwaadoohane awaadoobee'ane yitakkam heechqaanqa annanni issitakka'a atoorallehe.

Losixxi Lamo

FITO

Lam gaalchanne baxxantakka'a awwonoo sawwixxi hanenne mare'i suuminne baxxanchi woronne fitammehe. Itophphe'i minaadab hundinam maqi'lan ihoo heechqaanqa egerimminaa abooyimminaa soo'l baxxanchi losaanina sharad yoohane.

Ka sawwitenne mat gaalchii sharad yoohane; muli gaalchii sharad bee'ane yoo sawwite bakkiissa'a fitanchi hasisookko.

Losan Baxxanchi Sooro

Losisaanchi “ macceeshsha yookee'n heechqaanqa” yoo qanannaato qananaa'akku'uuyya sawwite la'immina issitakkam yakixxi bakki bakkinne mare'e awwaaxxakkamisa qoositakka'a moo'lehe.

MACCEESHSHI QEDDI YOO KEE'N HEECHQAANQA

Gaqqi suum yoo minaadab hundim ixxuwwi gaqqan ihaakkoo heechqaanqi hee'oohane. Nees macceeshshi qeddi yoo Itophphe'i oos gaqqan ihaakkoo suum niina yookko. Eebikkina ni gaqqan ihaakkoo heechqaanqim yookko. Ku ni heechqaanqi macceeshshi qeddi yoo kee'n heechchi qaanqa yamamookko.

Heechqaanqa yimmi heechchi googo yimma. Heechqaanqaam eddechchi, ichchi, kajji, mk heechchi gooqqi lambe'enne beyyamtam keeno. Macceeshshi qeddi yoo kee'n heechqaanqa yimmim macceeshshi qeddi yoo keen macceeshshi qeddi yoo keen ikko'i bikkina awwontam heechchi

googo yimma. Macceeshshi qeddi yoo kee'n heechchi qaanqa caakkisoo mulli heechqaanquwwisam edde'akkamisinne, itakkamisinne, kajjinnee mk yimmayyo. Macceeshshi qeddi yoo kee'n heechqaanqi caakkisookkok macceeshshi qeddi xa'moo bikkina awwonoo ni heechchi googonnette. Macceeshshi qeddi yoo kee'n heechqaanqi woriinse awwonoo keeno kobi'lishshoomina qaddaa'immi xansiisookko; mare'i suume "woci" asheerameena gaassaa illi edamchi qooccancha, atoorattu'uuyya illi ille moo'amcha, caakki yoobeyyo wixximma. Losakko'i losa'n mine, baxo, ga'na mk), mare'i summa uwwimma, annanni annanni gambayyaattuwwa awwaaxxakka'a wixxi-wixximmaa mk.

Maacceeshshi qeddi yoo kee'n heechqaanqi hindiyyaato qooccimmii haraassimmii awwaadoohane. Heechqaanqa la'isansimmi macceessam kee'naannonnee macceeshshi qeddi yoo kee'n lambe'ennee qooccamoo aagixxamcha hoogimma xa'isookko. Edaahim minaadab macceeshshi qeddi yoo kee'n bikkina e'laanchi hindiyyaat hee'oo'isa issimmi mateeyyoo'm heechchi woronne e'laanchi gaba'l woronne aaggamisa anga edookko. Ka ammanenne lobakat minaadab macceeshshi qeddi yoo kee'n heechqaanqanne danaam sawwit bee'e. Eebikkina macceesh qeddi yoo kee'n hundim siixxito'i gambayyaatonne ixxuwwi heechqaanqa la'ixxiteena yakite issitota'n awwaadookko.

Losixxi Mato

Hanaan hincukki qanannaat danaamisa aagukkisa qoossitakka'a lasonne qanannaatoom moo'lakkoo'n ki'nuwwina aagukisinne ki'nuwwi hincixxisinne beshshuwwina caakkissehe.

Aganni woronne awwontam keen exxito'isa qoossehe.

- ◆ Macceeshshi qeddi yoo kee'n heechqaanqi mahooma.
- ◆ Macceeshshi qeddi yoo keen mulli giichchiinse Itophphe'i minaadaphphi heechqaanqiinse annanni ihoo duuha'a.
- ◆ Macceeshshi qeddi yoo kee'n heechqaanqa haraassimmi hindiyyaato qooccimmi awwaado;

- ◆ Maacceeshshi qeddi yoo kee'n heechqaanqa haraassimminaa hindiyyaato qoocimmi woronne macceeshshi hooggo'i kee'n anga ejja.

Losixxi Lamo

Qanannaaxxisinne awwonoo keenina dabachcha uwwehe.

1. Macceeshshi qeddi yoo kee'n heechqaanqa yimmi mayyimda'e caakkissehe.
2. Macceeshshi qeddi yoo kee'n heechqaanqa Itophphe'i minaadaphphi maqi'l heechqaanqiinse hinkid annanni ihooda'e sawwite uwwehe.
3. Macceeshshi qeddi yoo kee'n heechqaanqiinse kobi'lishsha uwwehe.
4. Macceeshshi qeddi yoo kee'n heechqaanqa haraassimmanne yoo awwaado caakkissehe.
5. Macceeshshi qeddi yoo kee'n heechqaanqa haraassimmina Macceeshsha hoggo'i keeniinse mah egeramooda'e caakkissehe.

Losixxi Saso

Losisaanchi, awwonoo xuunsammi woccuwwa qananaa'aku'uuyya qoossitaka'a moo'lakku'uuyya "Hanqa" te'im "Qophphano" yoo mare'e awwaaxxitakku'uuyya daballehe.

1. "Macceeshshi qeddi yoo kee'n heechqaanqi" yamamoo heechqaanqi bee'ane.
2. Macceeshshi qeddi yoo kee'n heechqaanqa caakkisookkok heechqaanqaam eddechchi, ichchi duuha'i te'im heechqaanqaam kajja,
3. Macceeshshi qeddi yoo kee'n heechqaanqii giirgiichchi heechqaanqii kobi'lantamo.
4. Mateeyyo'm wixxite qoxxishshina Macceeshshi hooggo'i kee'n heechqaanqa haraassimmi hasisookko.
5. Hundem mannim Macceeshshi qeddi yoo kee'n heechqaanqi bikkina danaam sawwite yookko.

Losixxi Sooro

XUUNSAMMI WOC BAXO

Awwonoo sagalluwwa bikkoo mare'uwwa awwaaxximminne IMS xuunsammi woca baxxehe.

1. heechqaanqa
2. Maceeshshi qeddi yooke'e'n heechqaanqa
3. losano
4. Maqi'l heechqaanqa
5. wix wixxaa'aa

mannik bolxisoo heechqaanqa" yoo qanannaato sawwite laqqeena issitam yakixxi bakkinne mare'ooma awwaaxxakkamisam qoossitaka'a moo'lehe.

Itophphe'i mannik bolxisoo heechqaanqa Itophphe'i manni heeruullanne maala'lakkam maalalsiisoo heechqaanqi niinayoohane.

Kamashka'innem hiincho-hiinchonne dut bii'l uulli manni Itophphe'e daadeesseena waattamo.

Ni uullim ka daadeesaanii lobakat kaakum bii'l uulli diinate (bira) siixxitamo.

Hundim Itophphe'i giir, giichchi minaadab gaqqan ihaakkoo heechqaanqi yoohane. Ku heechqaanqi wocaqqoo suuminne, aganninne, gat luwwinne, mateeyyoo'm heechchinne, eddechchinne, ichchi sila'inne mk caakkookko.

Annichchi annichchi giir, giichchii minaadabii gaqqan ihaakkoo heechqaanqi yoohane. Exxaahim nees Itophphe'i minaadaphphisinnem hundem giichchoo minaadabaa maqiransoo mateeyyoo'm heechqaanqi yoohane. Ku mateeyyoo'm heechqaanqa lobakat doollii kidhoora nimateeyyoomina shooto'uwwa.

Kakee'n Itophphe'i minaadab hundane ihaakkoo maqi'l heechqaanqi woronne mateeyoominne xumma gariminne, iyyaqqamchi, lonsaqqamchi, lommanni amo'o lonsimmi, ta'mamchi, mk niheechqaanqa kobi'lishshi issakka'a qaddaa'immi xansiisookko.

Heechqaanqi hundim awwaaddam keenoyyo. Mat mat hegegonne jor heechqaanqa yamantam keen yo'o. Jora yamantam heechqaanqi woronne landa ballachchim, landi losano losoobee'isa hoorimmi, umur afoo'nem landa idootina uwwimmi, lamfoor amo'i fayya'oo'm mine awwontambee'isa issimmaa, fayya'oo'm xaaxxitenne maramaa qaramoobee'isa hoorimmaa mk. qaddamookko. Kido'ne'i heechqaanquwwa mateeyyanem bi'isimmi hasisookko.

Danaam heechqaaqa fuu'lisimmii waaroo qaranchina higinimmi annoomat hunditaneme.

Losixxi Mato

Qanannaaxxisinne awwonoo xa'michchuwwa mare'i suume awwaaxxinimminne qarxi woronne daballehe.

1. Qanannaatiinse laqqakko'i illi sawwite baxxanchi beshshuwwina caakkissehe.
2. Itophphe'i minaadab hundina maqi'lan ihukki heechqaanquwwiinse sas kobi'lishsha qaddaa'e
3. Bii'l uulli manni Itophphe'e daadeesso'uuyya ni uulli maha siixxitamda'e caakkissehe.
4. Laaphphaalli niheechqaanquwwa egerakka'a haareechchi qaranchina higinimmi annoomat ayyan ihukkisa ki'nuwwi losisaanchina caakkissehe.

XUUNSAM WOC BAXO

Qanannaaxxi woronne yoo tirato shooto'i issimminne awwonoo sagalluwwa bikkoo mare'uwwi hanenne soorii hanaan ihoo mare'uwwa amadoo xuunsammi woca baxxehe.

1. giir giichcho
2. Heechqaanqa
3. gudo
4. bolxiso
5. hawwodoo

LOSA'N BAXXANCHI SASO

Losixxi Mato

Awwonoo xa'michchuwwa baxxanchi woronne mare'i suuminne "atoorallehe" losamukkisam atoorachchi horoor woshshi mare'uwwi aw-waaxximmi xanat fuu'lisimmi ihukkisa sawwillehe.

1. Hundim ki'nuwwi giichchika te'im hee'lakkam hegeeqqi heechqaanqa qarxi beshina kullehe.
2. Ki'nuwwi giichchonne te'im hegeegonne losamukki heechqaanq woronne awwaadoohane awaadoobee'ane yitakkam heechqaanqa annanni issitakka'a atoorallehe.

Losixxi Lamo

FITO

Lam gaalchanne baxxantakka'a awwonoo sawwixxi hanenne mare'i suuminne baxxanchi woronne fitammehe. Itophphe'i minaadab hundinam maqi'lan ihoo heechqaanqa egerimminaa abooyyimminaa soo'l baxxanchi losaanina sharad yoohane.

Ka sawwitenne mat gaalchii sharad yoohane; mulli gaalchii sharad bee'ane yoo sawwite bakkiissa'a fitanchi hasisookko.

LOSA'N BAXXANCHI SOORO

Losisaanchi "macceeshsha yooke'n heechqaanqa" yoo qanannaato qananaa'akku'uuyya sawwite la'immina issitakkam yakixxi bakki bak-kinnem mare'e awwaaxxakkamisa qoositakka'a moo'lehe.

MACCEESHSHI QEDDI YOO KEE'N HEECHQAANQA

Gaqqi suum yoo minaadab hundim ixxuwwi gaqqan ihaakkoo heechqaanqi hee'oohane. Nees macceeshshi qeddi yoo Itophphe'i oos gaqqan ihaakkoo suum niina yookko. Eebikkina ni gaqqan ihaakkoo heechqaanqim yookko. Ku ni heechqaanqi macceeshshi qeddi yoo kee'n heechchi qaanqa yamamookko.

Heechqaanqa yimmi heechchi googo yimma. Heechqaanqaam eddechchi, ichchi, kajji, mk heechchi gooqqi lambe'enne beyyamtam keeno. Macceeshshi qeddi yoo kee'n heechqaanqa yimmim macceeshshi qeddi yoo keen macceeshshi qeddi yoo keen ikko'i bikkina awwontam heechchi googo yimma. Macceeshshi qeddi yoo kee'n heechchi qaanqa caakkisoo mulli heechqaanquwwisam edde'akkamisinne, itakkamisinne, kajjinnee mk yimmayyo. Macceeshshi qeddi yoo kee'n heechqaanqi caakkisookkok macceeshshi qeddi xa'moo bikkina awwonoo ni heechchi googonnette. Macceeshshi qeddi yoo kee'n heechqaanqi woriinse awwonoo keeno kobi'lishshoomina qaddaa'immi xansiisookko; mare'i suume "woci" asheerameena gaassaa illi edamchi qoocancha, atoorattu'uuyya illi ille moo'amcha, caakki yoobeyyo wixximma. Losakko'i losa'n mine, baxo, ga'na mk), mare'i summa uwwimma, annanni annanni gambayyaattuwwa awwaaxxakka'a wixxi-wixximmaa mk.

Maacceeshshi qeddi yoo kee'n heechqaanqi hindiyyaato qooccimmii haraassimmii awwaadoohane. Heechqaanqa la'isansimmi macceessam kee'naannonnee macceeshshi qeddi yoo kee'n lambe'ennee qooccamoo aagixxamcha hoogimma xa'isookko. Edaahim minaadab macceeshshi qeddi yoo kee'n bikkina e'laanchi hindiyyaat hee'oo'isa issimmi mateeyyoo'm heechchi woronne e'laanchi gaba'l woronne aaggamisa anga edookko. Ka ammanenne lobakat minaadab macceeshshi qeddi yoo kee'n heechqaanqanne danaam sawwit bee'e. Eebikkina macceesh qeddi yoo kee'n hundim siixxito'i gambayyaatonne ixxuwwi heechqaanqa la'ixxiteena yakite issitota'n awwaadookko.

Losixxi Mato

Hanaan hincukki qanannaat danaamisa aagukkisa qoossitakka'a lasonne qanannaatoom moo'lakkoo'n ki'nuwwina aagukisinne ki'nuwwi hincixx- isinne beshshuwwina caakkissehe.

Aganni woronne awwontam keen exxito'isa qoossehe.

- ◆ Macceeshshi qeddi yoo kee'n heechqaanqi mahooma.
- ◆ Macceeshshi qeddi yoo keen mulli giichchiinse Itophphe'i mina- adaphphi heechqaanqiinse annanni ihoo duuha'a.
- ◆ Macceeshshi qeddi yoo kee'n heechqaanqa haraassimmi hindiyyaato qoocimmi awwaado;
- ◆ Maacceeshshi qeddi yoo kee'n heechqaanqa haraassimminaa hindi- yyaato qoocimmi woronne macceeshshi hooggo'i kee'n anga ejja.

Losixxi Lamo

Qanannaaxxisinne awwonoo keenina dabachcha uwwehe.

1. Macceeshshi qeddi yoo kee'n heechqaanqa yimmi mayyimda'e caakkissehe.
2. Macceeshshi qeddi yoo kee'n heechqaanqa Itophphe'i minaadaphphi maqi'l heechqaanqiinse hinkid annanni ihooda'e sawwite uwwehe.
3. Macceeshshi qeddi yoo kee'n heechqaanqiinse kobi'lishsha uwwehe.
4. Macceeshshi qeddi yoo kee'n heechqaanqa haraassimmanne yoo awwaado caakkissehe.
5. Macceeshshi qeddi yoo kee'n heechqaanqa haraassimmina Mac- ceeshsha hoggo'i keeniinse mah egeramooda'e caakkissehe.

Losixxi Saso

Losisaanchi, awwonoo xuunsammi woccuwwa qananaa'ak- ku'uuyya qoossitaka'a moo'lakku'uuyya "Hanqa" te'im "Qoph- phano" yoo mare'e awwaaxxitakku'uuyya daballehe.

1. “Macceeshshi qeddi yoo kee’n heechqaanqi” yamamoo heechqaanqi bee’ane.
2. Macceeshshi qeddi yoo kee’n heechqaanqa caakkisookkok heechqaanqaam eddechchi, ichchi duuha’i te’im heechqaanqaam kajja,
3. Macceeshshi qeddi yoo kee’n heechqaanqii giirgiichchi heechqaanqii kobi’lantamo.
4. Mateeyyo’m wixxite qoxxishshina Macceeshshi hooggo’i kee’n heechqaanqa haraassimmi hasisookko.
5. Hundem mannim Macceeshshi qeddi yoo kee’n heechqaanqi bikkina danaam sawwite yookko.

Losixxi Sooro

XUUNSAMMI WOC BAXO

Awwonoo sagalluwwa bikkoo mare’uwwa awwaaxximminne IMS xuunsammi woca baxxehe.

1. heechqaanqa
2. Macceeshshi qeddi yookee’n heechqaanqa
3. losano
4. Maqi’l heechqaanqa
5. wix wixxaa’aa

LOSA’N BAXXANCHI ONTO

MARE’UWWI FINTO’O

HEECHQAANQA




“hwwch qaanqi” mare 'i finto 'o

- | | | |
|---|-------|------------------------------------|
| A. Mare'oo'm angi qoocci | | B |
| B. Mare'oom qooccamoo beyyi | | miinenne makki suume |
| C. mare'oo'm angi oobbi duuha'a | | qeddi kollonne |
| Ch. Mare'oo'm mikimikaat | | kululleesa |
| D. mare'oo'minne maqire maroo illi
caakkishshii orachchi mikmikaat-
tuwwi | | illi kollo qoxxisaka'a
moochcha |

Gaalchinne ihimminne hanaan uwwamukki kobi'lishshisinne ka usheexx-axxi woronne lossakko'i keeniinse horoor mare'uwwa fintehe.


USHEEXXAT SOORO

UULLANEE BEYYI SUMMUWWAA





Heer uulla




Afriiqa




Itophphe'e




Beero'o



Gassi qooxo'o



Zoon



Ga'na



Makkollonne



Qeddikollo
annannisimma




iime shiqqaa

LOSA'N BAXXANCHI MATO

MOO'IMMI QANANNAATO

Losixxi Mato


1. Awwonoo kaarta'uwwa qoositakka'a moo'lakka'a laqqakkam uulli summuwwikka mare'uwwa losisaanchina moo'issehe.
2. Kaarta'ooma shooto'i issimminne kaba siidantakkam beyyo lugumii ki'lakka'a iim afeebe'e (beero'o, worada, zoon, gassi qooxo'o, mat adilla'n gassi uulla, heeruulla) caakkissakkeena yakite issehe.



Heer uull kaarta'a



Afriiqqi kaarta'a



Itophpe'i kaarta'a

MISIL 10

Losixxi Lamo

Afiriiqqi kaarta'a shooto'i issimminne mare'uwwi woronne yoo bon beyyuwwanne wo'mimmi hasisoo mare'uwwa losisaanchina moo'issehe.

MARE'UWWA:-

Woro, makkollo, qeddikollo, woroo'n qara, hanaa'n qara, iimaa heeshshaa

Kobi'lishshina:-

Itophphe'i siidantamok Afiriiqqi woronnette.

1. Keeniya'i siidantamok Itophphe'iinse _____ tte.
2. Itophphe'i siidantamok Keeniya'iinse _____ tte.
3. Itophphe'iinse _____ siidantamotte Ertiira'atte.
4. Jubuut siidantam beeyyi Itophphe'iinse _____ tte.
5. Sudaan Itophphe'iinse _____ siidantamo.

LOSA'N BAXXANCHI LAMO

Losisaanchi “ I losa'n mi'n beshichchina afona” yoo qanannaato qanaanaa'lakku'uuyya sawwite la'immina issitakkam yakite bakki bakkinne IMS awwaaxxakkamisa qooxitakka'a moo'lehe.

I Qala'm Bishichchina Afona Hay iittommi I losa'n mi'n beshichcho;

Xa'mittisinnem igaga kiina la'summuuyyi lobakata liiramoommo.

I summi Ersado Laambaamo Lonsaqqo yamamoommo. Uulli beeto'o'mis-inne Itophphekkichcho. Qaramaa li'ummi beyyimii kaba hee'o'mmi beyyim Itophphe'i woronnette. Ayla'ukko laqqoo bee'an ihulas Itophphe'i siidantamok Eelliinchi fir Afiriiqannette.

Itophphe'i honsi gassi qooxo'onnee lam gaggassi beero'uwwanne baxxanto'oohan ihukkuuyyi an hee'o'mmok Dabuuphphi giir giichchi

gassi qooxo'onne, Hadiyyi Zoonanne, soo'l woradanne, Jaajura yaman-tam gootto'i beero'onne, luxxi olla'anne, mi'n xiq 00129 woronnette.

Jaajur Itophphe'i won beero'i Addis Aababiinse lam xibbee ontayyee mat kiilomeetira iixxe'la'a siidantamo. I losa'n min Jaaju'l luxxi gaba'l losa'n minee yamamookko. Ka ammanenne soo'l baxxanchi losaancho. Lobakata iittoommi losan hegeeqqi saayinsa.

Annanni annanni heeruulli baxxanchuwwanne qala'm beshshuwwi yookko. Saayinsi lachcha fuuliseena ixxuwwinne naqaashshuwwa dabas-saqqamoommo.

Ka gundi sawwixxi assikitaabina dabachcha uwwitlas kalasage haraassaa kitaaboommo. La'anchina ihona ku qax ihoo labisoommo.

Haydimminne

Ersado

Losixxi Mato

Qanannaato shooto'i issimminne awwonoo xa'michchuwwina ki'nuwwi losisaanchinne maqire qarxi woronne atoorallehe.

1. Ersad assikitaaba kitaabukkok ayyenatte?
2. Ersad assikitaaphpek horoor woshshi maha?
3. Jaaju'l beero'i siidamookkok hannonette?
4. Ersad ixxi ga'na caakkisukkuuyyi awwonukki illaglasagoom maha laboo?
5. Itophphe'i woronne mee'i gassi qooxo'ii mee'i gaga gassi beero'uw-wii yoo?

Losixxi Lamo

Qanannaato shooto'i issimminne awwonoo keeno wonshimmina hasisoo naqaasha losisaanchina uwwehe. (wo'mookkok Ersad ga'na).

1. Wo'm summa lobanni afeebe'e _____
2. uulli beetoom _____
3. Gassi qooxo'i _____
4. Zoon _____
5. worada _____
6. Beero'i _____
7. Olla'i _____
8. Mi'n xigi _____

Losixxi Saso

Losixxi lamonne issitakko'i losixxa shooto'i issimminne aw-wonoo ki'nuwwi wo'im ga'na qarxi beshshuwwina IMS hin-
caa'lehe.


1. Wo'm summa lobanni afeebe'e _____
2. Qaranchi _____
3. Gassi qooxo'i _____
4. Zoon _____
5. Woradi _____
6. Beero'i _____
7. Olla'i _____
8. Mi'n xigi _____

LOSA 'N BAXXANCHI SASO

MARE'UWWI FINTO'O

Losisaanchinne maqire ikkukka'a ka usheexxaxxi woronne lossakko'aan-
nika illi mare'uwwa fintehe.

Kobi'lishshina:-




BEYYO

“BEYYI” MARE'I FINTO'O






- | | | |
|---|-------|---------------|
| A. Mare'oo'm angi qoocca | | P |
| B. Mare'oom qooccamoo beyyi | | biq illagenne |
| C. Mare'oo'm angi oobbi duuha'a | | iim hooraa |
| Ch. Mare'oo'm mikmikaat | | kululleesa |
| D. Mare'oo'm maqire maroo illi caakkishshii orachchi mi | | mahim bee'ane |

USHEEXXAT ONTO

I KOBI'LOOMA



IIKKI + KOBI'LOOMA
= IKOBI'LOOMA

 <p>losano</p>	 <p>eroomma/galaxxisoohane</p>	 <p>Qoora/qoxara</p>
		
 <p>eroomma</p>	 <p>jora</p>	 <p>qoorooma</p>
 <p>lachchaam</p>	 <p>abga'a</p>	

LOSA'N BAXXANCHI MATO

MOO'IMMI QANANNAATO



MISIL II

Misila danaamisa saarayyitakka'a awwonoo keeno qarxi woronne mare'i suuminne daballehe.

1. misilanne moo'lakkam manchi irifamoo manchi maha baxubikkin-adda'e ki'nuwwi atwonna wocchehe.
2. Irifoo manchika, irifamoohaannikaa moo'oo mannaa moo'lakkamis-
anne irifamchi mannanne qooccoo sawwite caakkissehe.
3. Misilluwwa moo'imminne irifamchina gudiseena xanoo baxo caak-
kissehe.

LOSA 'N BAXXANCHI LAMO

Losisaanchi awwonoo qanannaato ege'lo'inne awwonnehe.

Macceeshshi qeddi yoo keen haareechchi luwwa qooccaancho (hanqo'i aganna)

Baxxanchi Mato

Heeruulla dabassito'i haareechchi luwwa qooccaan-
niinse matoom

Toomas Alivaa Ediisanette. Ediisan mulli keenii an-
nanni issoohaani

mat macceeshshi qedi yoohan ihimma. Edisan
oosoomaniinsem ki'isaa

macci xissam hee'ukko. Qaramukkaannii lamma'l hiinchonne
lule'oomam macceeshsha hoogukko.



TOOMAAS ALIIVA EDISAN

Ediisan oosoomaniinsem ki'isaa bila'aa sorooboothane hee'ukko. Mac-
ceeshshi qeddi yookeen baxxanchi woronne uwwakkam losano xab-
beenisinne awwoneena xanukkoyyo. Ediisan losisaan ixxonne yoo
hawwo laqqo'oyyi hee'lo'o. Ediisaanina "haanjo'i qawwa" yoo sum-
mi caakkisaancho uwwita'a hee'lo'o. Ediisan ihuta'nem kannonnem
neeyyato murukkoyyo. Ediisa'n ama losisaan is beeto "haanjo'i qawwa"
yamamoo'isa macceessa'a quunqinne losa'n miniinse fissitta'a issinenne
loosisimma asheetto'o.

Ediisan ama uwwitam losaniinse edaahim ixxi gag gagginnem loseena
kee'maal yakite issam hee'ukko. Eebikkina losa'n minenne uwwakkam
losaniinse hanaan la'ammi hee'ukko. Ediisan, ama losissam bee'i xire
ammame higisookkok qananaa'ukkuuyyatee soroobukkuyyatte hee'ukko.
Ixxi abaroos bux ikko'i bikkina tommonnee lam umuranne googaano

taakkiisoo baaburanne baxo siixxaa baxam hee'ukko. Baabur taakko asheeroo xire baabu'l qarxii qarxanne daba'lamukkuuyyi karameellaa xambi kitaaboo daba'lansamukkuuyyi bitesaa ixxi gaga abaroosaa di-inatinne tamam hee'ukko. Mat balla soroobukkuuyyam baabu'l woronne gii'l daafa ki'isubikkina baxiinse hollamukko.

Eelasage Baabu'l oodo'i kululleexxi woronne do'ukkuuyyi karameellaa xambi kiitaaboo'o bitesimma asheerukko. Mat balla mat ciilichcho baabur qoocceena ihaakkoo moo'aa qare'aa baabu'l illagii ki'isimminne daafii gatisaakko. Ka ciilichchi anni lobakata liira'mimmii ki'aa anga dabareena Ediisan Telegraafa asse'immaa aa'immi losano losisaa Teelegiraaf angi mixxeellaninne baxxaanchi issukko. Ediisaneka luxxi qoocci bax ixxo baxiinse hollisukko. Ediseen him hiimo afuuraa ammane egeraa baxo awwonsaanchina asso asse'immi hasis hee'ukko. Kaka baxoo Teelegraafa maashiina areesaa baxaa maashiin ixxi gagim amman egeraa asso asse'oo'isa issaa ixxi hqaawwo asheerukko. Baxi awwonsaanchi kak la'aa nadadaa baxii hollukko.

Ediisan la'm qoocci baxina aagukki dadda'l suuqi woronne sira'i naqqassoo koobo'i maashiina areesaa baxximmi hee'ukko. Ka haareechchi qoocco'ina luxxi ammanina soor kumi doolara miqakko'aare buxoomiinse firaa wo'm ammane uwwaa saarayyi baxo asheerukko.

Losixxi Mato

Qanannaato shooto'i issimminne issimminne awwonoo xa'michchuwwa qarxi woronne IMS daballehe.

1. Toomaas Aaliiva Ediisan mulli haareechchi luwwa qooccimmii annanni ihoo luwwi maha?
2. Ediisan lule'oomannem macceeshshi qeddi gamba'ukkok mee'i hiinchonnette?
3. Ediisan losiisaan Ediisan "haanjo'o" yamamaa weeshamoo'isa issukkok maha labisoo?
4. Ama losissam bee'i ammane Ediisan ammane higitsoo hinkidette

hee'ukko?

5. Ediisan Teelegiraaf ang bax lachchaam ihukki gambayyaato gundanne caakkissehe?
6. Ediisan luxxi qoocco'i baxi mishaa ka mishiinsem siixxukki awwaad mah hee'ukko?

Baxxamchi Lamo

Macceeshshi qeddi yookki Haareechchi luwwa Qooccaancho (hanqo'i aganna)

Ediisan lobakat luchcho qooccaakko. Macceeshshi qeddi hee'uta'neme hundem luwwim xanamookko yaa amma'nam hee'ukko. Mat balla muuziiqa lellakkam muuta baxeena mu'lukko. Baxeena hasukki luwwa woraqatanne misila ki'isaa ixxo tamoohaanina uwwaa ka misila moo'ukuuyya baxoo'isa ijaajukko. Tamaanchim muutooma gag mahi ihukkisa xa'moohaare "ku muut macceesimmaa wocimmaa xanoohane" yukko. Yakitim baxonne hosaa sagara inkiiraa hasukki ammane wociseena xanimminne agannanne luxxi manchi ihukko.

Kaballa awwaadonne hosaa yoo'i muuziiqa lellakkam keenii sagara inkiirakkam keenii hundim ka Ediisan qoocco'onne shooto'amchinne baxamto'ookeeno.

Hundiinsem hanaan Ediisaan la'amoo'isa issukkok ampuula qooccimma. Manni caakkina shaama'a awwaaxxam hee'ukki xire luxxi ammanina ampuula qoocukkuk Ediisanette.

Ampuul hasisoo elektiriiqqi malaayye buqaa'oo Jenereteera qoocukkuk Ediisanette.

Ka haareechchi luwwa qooccimmi kaballa e'laanchisinne axisamaa awwaaxxinoommok elektiriiqqi caakka buqaa'akkam oodo'I iheena xanaakko. Silki tekenolooje'e fuu'lisimminne hiixxe'i beyyina baxoo'isaa sagaraa misilaa edamsimminne sinima'i baxina shooto'i ihukkuk Ediisanette. Kannonnem "sinima'i anna" yamamaa la'amookko.

Ediisan sadeentayyennee soor umuranne lehinne annanni iheebe'e mat kumii hanaan ihaakkoo haareechcho qooccu bax mishiina annichchi hee'ukko. Kaballi afeebe'e heer uullanne kaa'n qoocco'i mishina annichchi ihukki haareechchi luwwa qooccaanchi bee'e.

Ediisan macceesha hoogimma jabbisa moo'ubee'i bikkina lachcha macceesimma xansiisoo muuta baxeenaa awwaaxxeenaa hasukkoyyo. Diqakka'a gobimminne macci macceesoo'isa issimmi xa'michchi hicukkaarem aa'ukkoyyo. Mashka'a xa'makkamaare "Macceesha qeddi hee'immi tamukko bagaan eese hawwodukkoyyo" yaa dabaraakko. I macceesimmi hoongi mah luwwam baxeenaa qolat ihukkoyyo yaa ama'nam hee'ukko.

Losixxi Mato

1. Qananaa'akko'i Toomaas Aliiva Ediisan aganna gundissakka'a qarxi beshshuwwina caakkisehe.
2. Ka Ediisan aganna lossakko'aanniinse illi losano fintitakka'a caakkisehe.

Losixxi Lamo

Qanannaato shooto'i issimminne awwonoo xa'michchuwwina baxxa woronne IMS daballehe.

1. Ediisa'neka ka maalalsiisoo saarayyimmi baxo doonisiisoo'isina mashka'i maha yitakka'a sawwitakkamo?
2. Ediisan makkixxaakkoo heechchina afisukkok haareechchi luwwi qoocco'i mish mah hee'ukko?
3. Ediisan higi la'ammi issukki haareechchi siiddo'i luwwina won beyyo amadoo siiddo'i hinkane ?
4. Ediisan ixxi lachcha macceesimma xansiisoo muuta baxeenaa awwaaxubee'ek mahinatte?
5. Ediisan macceesimmi qeddi hee'immi sawwit maha labam hee'ukko?

6. Ki'nuwwi Ediisan ikkakkota'n ki'nuwwi lachcha macceesakkeena xansiisoo muuta baximmina Awwaaxxitakkam hee'lakko'o? Ki'nuwwi dabachcha mashka'inne eddakka'a caakkissehe?
7. Ediisan mee'i qoocco'uwina annichchi hee'ukko?
8. Ediisan macceeshshi qeddi hee'immi qoocco'i mishshuwwi hanenne issukki angi ejjo'o caakkissehe?

Losixxi Saso

1. Ediisan neeyyato muraa losano uulisaakoohane yakko'ita'n ixxi la-saanchchi mah ihooda'e atwonnehe.
2. Ediisan losisaan Ediisan "haanjo'i qawwa" yita'a weeshshimmi han-qa yitakka'a sawwitakkamo Dabachcha mashka'inne bakkiissehe.
3. Ki'nuwwi Ediisanette ikkakkotta'n maha issitakkam hee'lakko'o?
4. Ama Ediisana losa'n miniinse fissita'a isi minenne losisseena yakito'is hanqi hee'ukko? Dabachcha mashka'inne bakkiissehe.
5. Ediisanenne maqire labaqqamoo gambayyaat yoohonnihe? Yoolas qarxi beshshuwina baxxansehe.

LOSA 'N BAXXANCHI SASO

FITO

1. Ki'nuwwi baxxanchanne te'im losa'n minenne kobi'loomina gudisoo baxo baxaakkoo

yitakka'a ama' nitakkam mat losaancho annanni irifo'ina xeeqqamchinne hincaa'lehe.

Hincaa'lakko'i xeeqqamaanchanne mull losaan hicaa'lo'i xeeqqamaanchiinse e'laanchi irifo'i laboohanda'e ki'nuwwi xeeqqamaanchi ihukkisa amma'niseena xanoo mashka'a hincaa'lakka'a fitammehe.

LOSA'N BAXXANCHI SOORO

MARE'I BAXXANCHUWWI FINTO'O

Ki'nuwwi losisaanchinne maqire ikkakka'a ka usheexxaxxi woronne lossakko'aaniinse won won

Mare'uwwa finttehe.




KOBI'LOOMA

I KOBI'LOO'M MMARE'I FINTO'O

- | | | |
|--|-------|------------------------------------|
| A. Mare'oo'm angi qoocci | ----- | A / Sh |
| B. Mare'oom baxamoo beyyi | ----- | biq illagenne , angi oobbi woronne |
| C. Mare'oo'm angi oobbi duuha'i | ----- | bii'l kollo / hanaan aade |
| Ch. Mare'oo'm mikmikaat | ----- | woriinse bii'l kollonne |
| D. Mare'oominne maroo illi caak-kishshii orachchi mik mikaatii | ----- | illi kollo qoxxisaa moo'imminne |

USHEEXXAT LOHO

I SA'AAT MEE'OTT?



Sa'aat + Mee'o = Sa'aat Mee'o?



Illage / quuxo (sa'aata)



lam sa'aata




savgud balla




sa'aaxxilasage



tuunso




hiimo




dara



balla



celliinchi aagga



daqiiqa

LOSA 'N BAXXANCHI MATO

Losixxi Mato



MISIL 12

Misilluwwa qoositakku'uuyya moo'lakka'a moo'isakkam ayyaa'm baxxancha losisaanchina kullehe.

Losixxi Lamo

Awwanoo sagalluwwa bikkoo ayaa'meka hinki baxxancha bikkooda'e qarxi beshshuwwinne maqire atoorallehe. Hanaan hincukki misilluwwaa misilluwwannem isittakko'i atoorachcha shooto'amchinne mare'uwwi bikkitam keeno ayyaa'm ayyaam'm baxxanchi ammane xigaancho mi-si'l hanenne moo'issakkeena yakite issehe.

- | | |
|-----------------|---------------------|
| 1. Soodanna | 4. Sa'aaxxi lasage |
| 2. Dara | 5. Eelliinchi aagga |
| 3. Samgud balla | 6. Hiimo |

LOSA'N BAXXANCHI LAMO

XA'MIMMAA DABARIMMA

Losixxi Mato

Awwonoo xa'michchika dabachchi googo losisaanchinne maqire losixxehe.

Erbeeto: Urato issehe losisaanchi mat xa'michcha xa'meena xanoommo?

Losisaanchi: Eeyya xantootto Erbeeto;

Erbeeto: Xig matonne hincukki misil moo'isookkok hinkaa'n balli baxxanchannennihe?

Losisaanchi: Losaan, Erbeet xa'michcha dabareena xanoo losaanchi yoo?

Eroommo: Eeyya losisaancho, an dabaroommo.

Losisaanchi: Danaamo Eroommo, Erbeet xa'michcha dabare!

Eroommo: Misi'l xig mat moo'isookkok dara Eelliinchi firkollo.

Erbeeto: Galaxxoommo Eroommo!

Eroommo: Losisaanchi muli xa'michcha xa'meena xanoommo?

Losisaanchi: Eroommo urato issittuuyya muli xa'michchina amman bee'e.

Losixxi Lamo

Lam lam ikkakka'a la'm losixxanne isitakko'i losixximmi xa'michchaa dabachcha issehe. Xa'michchannem dabachchannem maqire atoorallehe. Losixximma guulitakko'isamqarxi beshshuwwi ilagenne hincimminne ki'nuwwi xa'michchaa dabachchaa hincaa'lehe.

LOSA'N BAXXANCHI LAMO

SA'AATA QANANAA'IMMA

Losixxi Mato

Awwonoo Sa'aata qananaa'akkamisa losixxehe.

Amman xiiginne Qananaa'akkamisa

- 3:00 Sas sa'aata
- 3:10 Sasii tommi higaakko
- 3:15 Sasii tommii onti daqiiqi higaakko
- 3:30 Sasoo kolloo
- 3:45 Soorina tommii onti daqiiqi gatoocko
- 3:55 Soorina onti daqiiqi gatoocko.

LOsixxi Lamo

Misilanne moo'lakkam sa'aata IMS kullehe.



MISIL 13

LOSA'N BAXXANCHI SASO

Losaan, losisaanchi Lombaam hoshsha qananaa'akku'uuyya IMS aw-waaxxakkamisa danaamisa moo'lehe.

LOMBAAM BALLI HOSHSHA

Lombaam soo'l baxxanchi losaanchi ihaatem hee'ookkok Addis Ababannette. Lombaam sa'aata awwaaxxookkok qoodaatette. Ballina ballina iinsii ki'ookkok tommonnee lami sa'aatannette. Habiillo edde'eena shu'm mine awwaaxxeena sad daqiiqi ihookko. Tommiinsee lamiinsee kolliinsee matina tommii onti daqiiq gateebe'e ginjira itookko. Tommonnee onti daqiiqqi woronne ginjira itukki muuta aanshaa beyyo beyyonne dissookko.

Losa'n mine mareena miniinse firoomkok mat sa'aatannette. Losa'n mine afookkok lamina tommii onti daqiiqi gatukkuuyyatte. Mashka'oomim ixxi miniinse losa'n min afeebe'e goog soree onti daqiiqaa massookko.

Balli lamarii kollii afeebe'e losa'n minenne higisookko. Balli sadeenti sa'aatanne mine daba'lookko. Sadeentiinse sadeentii kollii afebe'e hooshsho'o itookko. Eelasage sadeentiinse kolliinse ki'isaa honsii kollii afeebe'e usheexxookko. Ka ayyaa'm losano soroobimma asheerookkok honsonnee kollonnette. Honsiinsee kolliinsee tommii mat sa'aat afeebe'e uwwakko'i mi'n baxo baxookko.

Tommonnee lam sa'aatanne olla'i beshshuwwine maqire lalleena firoomko. Lellina bi'isoo amman mat sa'aat xale'e. Tommiinse lamii hii'm mat sa'aat afeebe'e amana hii'm ishsha gudisukkuuyya hara'mookko. Hii'm mat sa'aatanne hii'm ichcha itookko. Ichcha itakko'i muuta aanshimminne amana hara'maa lasaga hii'm lam sa'aat afeebe'e ixxi abaroosinne maqirem Televixhiina moo'amookko.

Hii'm lam sa'aatiinse ki'isaa sas sa'aat afeebe'e losano sorooboo amman ihookko. Balla losukkoka edaahim soroobookko. Aagubee'i luwwa edaahim annaa amaa xa'mookko. Annim balla losukkoka moo'aa xishshaqqa

issookko. Hii'm sasiinse soor sa'aat afeebe'e Televixhiina a Sinima'aa moo'ookko. Lombaam iinsina marookkok hii'm soor sa'atannette.

Losixxi Mato

Qanannaato shooto'i issimminne awwanoo xa'michchuwwa baxxanchi woronne IMS daballehe.

1. Lombaam diriichchiinse ki'ookkok da'l mee'i sa'atannette?
2. Lombaam ginjira iteena awwaaxxookkok mee'i daqiiqannette?
3. Lombaam losa'in mine mareena minii firookkokmee'i sa'atannette?
4. Lombaam losa'n minenne higisoo mee'i sa'aata?
5. Lombaam bal-balla soroobookkok mee'i sa'aatinatte?

Losixxi Lamo

Shiinnaatisimma

Qanannaato shooto'i issimminne "A" lokkaaganne yookeeno "B"lokkaaganne yookeeniinse shiinnaatantam keeno shiinnaatissehe. Losisaanchi "A" lokkaaganne yookeeno IMS moo'isakkaamaare ki'nuwwi "B"lakkaaganne shiinatomookkoka mare'inne moo'issehe.

Lombaam balli woronne
baxoo luwwa (A)

Baxoom baxamoo
ammame (B)


- 1 Lombaam insiinse ki'ookkok
- 2 Lombaam ginjira itaa guullookkok
- 3 Lombaam losa'n mine afookko
- 4 Lombaam mine da-ba'lookkok

- A. Ballaannonne honsonnee kollonne
- B. Hii'm mat sa'aatanne
- C. Tommonnee mat sa'aatanne
- Ch. Da'l tommonnee lam sa'aatanne

- | | |
|---|---|
| 5 Lombaam mi'n baxo
asheerookko | D. Hii'm sas sa'aatanne |
| 6 Lombaam lellina firookko | E. Hii'm soor sa'aata |
| 7 Lombaam hii'm ichcha
itookko | F. Hii'm lamonne |
| 8 Lombaam hii'm sorooba
asheerookko | G. Da'l lamina tommii onti
daqiiqi gatukkuuyya |
| 9 Lombaam hii'm soroo-
bo'o guullookko | H. Ballaannonne sadeenti
sa'aatanne |
| 10 Lombaam ense'eena ma-
rookko | I. Dara mat sa'atina tommii
ontidaqqiiqi gatukkuuyya |

LOSA'N BAXXAMCHI SOORO

Gortannikaa Xaraphpheetzika sa'aata qananaa'imma



Losixxi Mato

Xuunsammi woc Baxo

Ki'nuwwi losisaanchinne maqire ikkukka'a misilanne moo'lakkam sa'aata qananaa'lakku'uuyya xunsammi woc woronne awwaaxxitakka'a moo'issehe.

Kob'lishshina:

Sa'aat xig mat : lamiinse tommi daqqiqi higaakko yookko.

Sa'aat xig sas : Da'l sas sa'aata moo'isookko.

Losixxi lamo

Aganna kura

Lombaamika kobi'lishsha shooto'i issitakka'a ki'nuwwi balli hoshsha sa'aatinne eddakka'a qaarxi beshshuwwina caakkissehe.

LOSA 'N BAXXAMCHI ONTO

MARE'UWWI FINTO'O

Losisaanchinne maqir ikkukka'a losa'n woronne lossakko'aannika illi mare'uwwa fintehe

SA'AATA




“ Sa'aati” mare'i finto'o

- A. Mare'oo'm angi qoocci ----- qubbukki moo'isaanchi
maxxaara
- B. Mare'oom baxamoo beyyi ----- qeddi angi qinxixxi gurubbo
- C. Mare'oo'm angi oobbi ----- aadi moo'oo kollo
duuha'i
- Ch. Mare'oo'm mikmikaat ----- iimii aadii
- D. Mare'oominne maroo illi ----- mahim bee'
caakkishshii Orachchi
mikmikaatii

USHEEXXAT LAMARA

ICHCHI DOO'LO'O



ichcha + doo'lo'o = ichchi doo'lo'o



ichcha



mine



agga



Doo'lo'o



Paasta'a




Laslaassa



wica



geeja



mishshuwwa



Sulso'o



maa'l babiso'o



woxa

LOSA 'N BAXXANCHI MATO

ICHCHI HAGALLUWWI MARE 'UWWA

Losixxi Mato

1. Woroon misilanne moo'lakkam ichchi hagalluwwa laqqakkam ichcha mare'inne moo'issehe.
2. Misi'l woronne bee'eka ki'nuwwi hegeeqqi te'im giichchan ihookki ichchi hagar yoolas minenne awwaaxxitakkam mare'e qarxi beshshuwina moo'issehe. Mine – minenne awwaaxxitakkam mare'e annanni annanni ihulas e'laanchi mare'e doo'litakka'a ka lasagina ee mare'i xale'e awwaaxxitakeena iittammehe.



MISIL 15

LOSA 'N BAXXANCHI LAMO

ICHCHAA AGGAA DOO'LAKKAMISA

Losisaanchi (Erqoocci ichchi mi'n gambbayyaato) yoo qanannaato qananaa'lakkuyyi IMS awwaaxxakkamisa sawwitoomanne danaamisa awwonnehe

ERQOOCCI ICHCHII MI'N GAMBAYYAATO

Baxxanchi Mato



MISIL 16

Mat balla, iyyanni eesse, iyyummaa hoffi iyyaayyaa hooshsho' o koyy-
inanseena ichchi mine amadaa marukko. Ichchi mine aagimmina iina
luxxi xirem hee' ukko. Anga aanshaqqinaa afuullumisam iyyanni qaph-
phaa anga aphphisukko. Danaanaanchi waaraa “Maha ijaajamo?” yaa
xa' mukko.

“Mahi yookko” yukko iyyanni cababaa. Danaanaanchim mulli xaraph-
pheed haniins mat laastiikinne eddeesamaakkoo kitaaba laboo luwwa
iyyannina uwwaa marukko. Iyyannim amadukki kitaaba laboo luwwa
moo'isukkuuyya “Kuk meeno' o yamamookko” yukko. Ka meeno' onne
annanni annanni ichchi hagara bitinne maqirem kitabamaakkoohane.

“An hasoommok maa' l babiso' o, ki' nuwwim hassakko' oka doo' limma
xantakkamo” yukko.

Iyyanni meeno'ooma nikollonne biddiqaa'ukkuuyya.

“An hasoomokki kashar woxa” yito'o iyyumma meeno'oomam moo'loo'ne.

Meeno'ooma iyyannii aa'aa iyyannisam cababaa afuuraa diidaramukkoka qananaa'imma asheerummo. Lobakat ichchi summuwwi iina haareechi hee'ukko. Injeera yoo summoomam moo'eena xanummoyyo. I hawwo la'ukkan ihaa mishiqaa ”ichchi mine aagaa meeno'onne diidaramukki ichchi summik mahoom aagubeelas danaanaanchi caakkisona xa'miteena xantootto” yukko.

“Manni injeera itukkuuyyatte ihukkaarem ka diidaa'l woronne mahina bee'atahe?” yummo

iyannina edaahim.

“Ichchi minenne injeera maa'l babiso'inne te'im kashar woxinne mk yamamooyyo. Kashar woxa maa'l babiso'oo mk.”

Yimmim injeerinne maqire yimma. Ati ijaajjitlas daabbo'innem eebeena xanookko.

“An hasoommokki shorbo'o” yummo bolxaa. “Iinam” yito'o iyyaayyam eese awwonta'a.

Iyyanni odim anga aphphisukkaare illaqqi danaanaanchim waaraa nigadanonne uullukko. Ka hoffi tiissiishshi daftara amadaakko.

“ Mat maa'l babiso'o mat kashar woxa lam shorbo'oo ” yukko iyyanni. “Agakkam luwwa maha eebo?” yaa danaanaanchi xa'mukko. “lam biira'a lam faanta'aa” . Iyyanni iittinoom luwwa la'oo bikkina neese xa'moo'nem dabachcha uwwukko. Ichchi waareebe'e egellummuuyyam iyyanni ichchi mi'n see'l bikkina edaahim losano uwwuko. Kb: Ichchi minenne bitonne fitamakkam bee'isa ihukkaarem ayyi manchim ichcha ijaajeena gaassaa mee'no'o qananaa'aa bitonne iittamu beelas ureena xanoo'isa odim ichchi waara lasonne dabarimmi te'im hasoommoyyo yimmi xanamoo bee'isa caakkisukko.

Losixxa

Qanannaato shooto'i issimminne awwonoo xa'michchuwwa IMS losaa'n illagenne daballehe.

1. Erqoocci ichchi mine aagimmina meekore hee'ukko?
2. Erqoocci ichchi mine marukkok ayyennem maqire hee'ukko?
3. Danaanaanchi xaraphpheed hani ki'isaa Erqoocci uwwukkok laas-itiikkinne eddeesamaakkoo kitaaba laboo luwwi mah hee'ukko?
4. Erqoocci meeno'o moo'aa maala'lukki luwwi mah hee'ukko?
5. Ichchi mine aagukki manchi meeno'i woronne diidaramukki ichchi hagara laqqitbeelas mah issimmi hasisoo?

ERQOOCCHI ICHCHI MI'N GAMBAYYAATO

Baxxamchi Lamo

Intaa angaa guullinummisam iyyanni edaahim anga aphphisukko. Anga aphphishsha macceesaa danaanaanchi

waarukko. "Badan mee'o?" yukko iyyanni. Danaanaanchchim maham wocoo'n daba'laa elle'ukko.

Danaananchm

memo,o labbamota ihukkaarem qaxoo'misanne hoffi daftara labbamota eebaa iyyanni illagenne dissukko.

Iyyanni fooqaa'oohaare mat gootto'i woraqat woronne yookkoka moo'ukko. Iyyanni ki'isii bira fissaa ee dabta'l labbamaant woronne dissa lasonne danaananchina uwwukko. Gootto'i woraqatichcho ki'isaa moo'isukkuuyya "Sirra'i naqaasha xa'mimmi hasisookko. Neese sirra'i naqaasha xa'minummi beelas adilina miqimmi hasisoo sirra'a miqooyyo. Adil sirra'a egeraa miqisu beelas odim iini'noo adi'l baxaanina miqo'o uwwimma,losa'n minneewwi, fayya'oomaegerakkam xaaxxittuwwi, googguwwii mk. baxameena xanooyyo. Kukim neese hawwodookko."

yukko.

Danaananchim massukki gootto'i daftara laboo luwwa dabaraa eebaa iyyanni illagenne dissukko.

Maala'laamma iyyanninsem gaassa fooqa'oommaare woronne yookkok iyyannina daba'limmi laboo

bir ihukkisa la'ummo.

Filleena inkaamoohaannonne sirra'i naqaasha dereeraa hacca wixxaa'ak-kam qarcaaxxi woronne ubbuusukko.

“Hinkide?!” yummo maala'limminne. “Adilina uwwitoo labisam hee'ummo.”

“Kuk adilina uwwamooyyo.” yukko iyyannim.

“Kuk uwwamoo beelas adilina minqquummis mahinne la'amoo?”yaa iyyanna xa'mummo.

Siixxum haarechchi losanonne lobakata liiramaa iyyanna galaxxummo.

Losixxi Mato

Sawwite Wixxaachcha

Hanaan hincukki qanannaato gundissakka'a ki'nuwwi gaqqi caak-kishshinne eddakka'a qarxi beshshuwwina caakkissehe.

Losixxi Lamo

Qanannaato shooto'i issimminne awwonoo xa'michchuwwa qarxi woronne IMS daballehe.

1. Erqoocci anni edaa edaa anga aphphisukkok mahinatte?
2. Erqoocci aayya doo'lito'i ichchi maha?
3. Bitoo aa'akko'i luwwina naqaasha xa'mimmi hasisookkok mahinatte?
4. Adil minqummi bi'l qaxooma hinkid la'oo?

5. Erqoocci ichchi mi'n gambayyaatonne macceesamukki luwwi mah hee'ukko?

Losixxi Saso

Gaalchi atoorachcha

Gaalchanne ikkalka'a qanannaaxxi woronne Erqoocci ichchi mi'n woronne losukki haareelli losano annanni issitakka'a hincuu'isa issehe. Gaalchi baxo baxxakkam xire losisaancho xa'mimma badditakkotte.

Losixxi Sooro

Qanannaaxxi woronne la'amto'i ichchi mi'n woccuwwa diidaallehe.

Kobi'lishshina:

“Lam biira'aa lam faanta'aa”

Losixxi onto

Diraama'a


Lam lam ikkalka'a mat danaanancho mulleka danaanakkam manchi ihaa ichchi mi'n woronne gundi diraama'a laba

besshuwwina hicaa'lehe.

Losa'n Baxxanchi Saso


Sono'aam ichcha

Lato'ii Leero'ii ichcha doo'lamukko



MISIL 17

- Lato'o: Ginjira mah itimma doo'litoo?
- Leero'o: Dabbo'oo shahe'ee iteena doo'loommo.
- Lato'o: Anim ki'isame. Shollee'aalli ginjiranne liiramoommo. Iyyabbaayyi ihukkaarem ginjira iteena iittooyyo.
- Shahe'i xale'e agaa losa'n mine marukkuuyyaa
hooshsho'ina uwwakkam birinne karamellaa maasitiikaa
aa'aa iicukkuuyya hosookko. Lobakata nacao hoongan-
choo ihubikkina laqqam keen hundim faangayyitamo.
- Leero'o: Iyyabbaayyaanninne odim edamchi bee'ane. Hoorakko'i
beelas ginjiraa hooshsho'oo yimmi bee'ane.
- Siidukki luwwi hundam higisaa itookko. Lobakata geejjim-
mii ki'aa xulbe'e lellaa xanooyyo. Ixxi gejjoomii ki'isaa
manni hundim gadookko. Odim hundammanem xissookko.
- Lato'o: Iyyabbaayyim lobakat ammane xissookko. Lobakata haw-
wosoo xissi maruchcho?
- Leero'o: Paasta'a duubbi kaashshuwwinne luxxi doo'lo'o. Ihuk-
kaarem ballanne mat koriinse loboka itoommoyyo.
Fayya'oominaa xaligganinaa ichcha dabaransaa hurbaata
iteena yakummuuyyatte?
- Lato'o: Iikki luxxi doo'lo'i mishshuwwwa.
- Leero'o: Ihukkaarem mishshuwwa ejjo'ina itakkamane bagaan mul-
lam ichchi ikkeena xantamoyyo.
- Leero'o: Iyyummam kaka laboo woshsha kutto'ookko. Ka mash-
ka'inne fayya'oomina mishshuwwa iteena illage mulli
ichcha itoommo.



MISIL 18

Losixxa

Leero'oo Lato'oo wosso'lito'isinne awwonoo xa'michchuwwa qarxi woronne IMS daballehe.

1. Misi'l woronne Lato'i abbaayyi hinkan ihukkisa losisaanchina caakkissehe.
2. Misi'l woronne Leero'i abbaayyi hinkan ihukkisa losisaanchina caakkissehe
3. Gabaliinse hoffiisakkatii gabaliinse lonsakkatii itimmi afisoo hawwojja kullehe.
4. Leero'o fayya'attee xaligattee ikkeena awwontam ichchi seer maruchcho?
5. Lato'o mishi xale'e ittam bee'isa soganto'ok mahina labissakkammo?

LOSA'N BAXXANCHI SOORO

MARE'UWWI FINTO'O

Losisaanchinne maqire ihimminne usheexxat woronne lossakko'aanniinse illi mare'uwwa fintehe.




ICHCHA

ICHCHI MARE'I FINTO'O

- | | | |
|---|-------|------------------------------------|
| A. Mare'oo'm angi qoocci | ----- | xufammi onti xigo |
| B. Mare'oom baxamoo beyyi | ----- | suu'm hanenne |
| C. Mare'oo'm angi oobbi duuha'i | ----- | Woro'l kollonne |
| Ch. Mare'oo'm mikmikaat | ----- | bii'l kolliinse
woro'l kollonne |
| D. Mare'oominne maroo illi caak-
kishshii orachchi mikmikaatii | ----- | cababbaakkoo ille |

USHEEXXAT SADEENTO

QAR YOO KOLLO ANNANNI ISSIMMA




Qara

Annanni issimma

 <p>hanaan</p>	 <p>iim aa'aa</p>	 <p>makkollo</p>
 <p>abbiso</p>	 <p>midaado</p>	 <p>qee'lo</p>
 <p>makka</p>	 <p>qedda</p>	 <p>Qa'l kollo</p>
 <p>Xabbeen illaqkollo</p>	 <p>Qeddikollo/ qa'l kollo annannissimma</p>	 <p>daajje</p>

NI OLLA'A



MISILA 19:

Losixxi Mato

Moo'immi Qanannaato

Awwonoo misila eege'lo'inne moo'lakka'a maha moo'lakkoda'e qarxi beshshuwwina caakkissehe.

NI OLLA'A

Awwonsa: Losisaanchi awwonoo gundi qanannaato qananaa'akkamaare danaamisa awwonnehe.

Ni olla'i Addis Abaaphphi woronne ebeer hegeegiinse matotte. Ni olla'i illageen higoockokii lambe'i kolli Addis Ababa massookkok haraar asipaalti goog yookko. Qeddanee makkannee odim lob aspaalti googii asheeraa daajji afeebe'e afookki gaba'lisa awwaadoo xuqqi woro'l goog-guwwi yookko.

Ni hegeqqi afa'li kollinne gaba'lamaa hegeeqqi hacca fii'aa massaa el-lesoo ni hegeeqqi mucuroomina tamoo daajji yookko. Hegeeggonne aspaalta awwonaa baxamukki annanni annanni dadda'l xaaxxittuwii

gimbi minneewwii yookko. Makkinnee qeddi kollinnee olla'i tohchonne lam hoteelluwwi yo'o. Qeddi kollik lob hoteel ihukkuuyya makki kollinne odim yookkok hof fi hoteela. Lob hotee'l midaadinne kobe'i suuqqi yookko.

Hoffi Baankii makkollinne ni olla'i oosii xulbe'e lellinoom hof biir beyyi yookko. Qeddi kollinne odim olla'i meer siidamookko. Ayyaanaam min, mee'l illagennette. Ni min geejji

Hotee'l afaree'n kollinne xuqqi aspaalti kollonne dabaraa baxamukki haraar ooxxi woronnette. Mare'oominam ihona goocanne suuqichcho yookko.

Ni mi'n midaadinne marife'e qaxxakkam min yookko. Ellaambaam min marife'e qaxxakkam minii woroon siidamookko. Gatukki olla'I uulli ixgina'i ixxim amaxxamto'oka

laboo ebeer minneewwi nne ifisamaakko..

Losixxi Mato

Baxxanchi beshshuwwinne maqire lam lam ikkaka'a ki'nuwwi olla'i bikkina ammannishsha dabasaqqammehe. Uwwamukki amma'nishshisinne sholle'aalli mare'uwwa awwaaxximminne ki'nuwwi beshichchi olla'i misila ki'isakkeena yaki'lehe. Misiloomeka illi xiniininne summamto'i beyyuwwi qoocca uwwakkam amma'nishshinne maqire labaqqamoohan ihimma sawwi'lehe. Ki'nuwwi misilina amma'nisha uwwukki losaanchi moo'aa amma'nishshii misilii hinkaa'na labaqqamtamda'e oogattehe.

Losixxi Lamo

Qar kollo Moo'isaancho Awwaaxxakkamisa

1. Losisaanchi qanannaato qananaa'akku'uuyya awwaaxxakko'i qar kollo moo'isaanchi mare'uwwa fintitakka'a moo'issehe.
2. Xig matonne fintitakko'i qar kollo moo'isaanchi mare'uwwa awwaaxximminne ki'nuwwi hegeeggonne siidamoo illi beyyuwwi hannonne siidamooda'e qarxi beshshuwwina caakkissehe.

LOSA'N BAXXANCHI LAMO

QAR KOLLO XA'MAKKAMISAA DABAR- AKKAMISAA

Mahaammade: Hay fayyaa'oom xaaxxitenne fissoo goog hin-
kee'nnette?

Bootamo: Illaqqi kollonne xibbi meeti'l qaxa mattitisaam qed-
di kollonne dufitoohaare , qadaalli soor fooq mine
moo'lootto. Fooqii higgoohaare xuqqi googo siid-
dootto. Googo awwontaa mattoohaare fayya'oo'm
xaaxxixxi gadano afisookko. Fayya'oo'm xaaxxitoom
yookkok woronne aaggoohaarete.

Misho'o: Urato isse, meera massoo googi hinkeenette?

Abdalla: Lob googo awwantaa illaqqi kollonne mattoohaare
hospitaalla moo'lootto. Meerom hospitaaliinse aadet
ihookko. Hospitaala higgittisaam siiddoottoka luxxi du-
faachchi googo awwontaa makkollonne dufitoohaare
meera moo'leena xantootto.


Losixxa

3. Sawwit dabassaqamchi woronne kurakko'i qa'l kollo moo'isaanchi
mare'uwwa moo'issehe.
4. Xa'michchi xig matonne uwwamto'i dabachcha awwaaxximminne
xuunsammi woca baxxakka'a losisaanchina mo'issehe.

LOSA'N BAXXANCHI LAMO

MARE'UWWA FINTO'O

Losisaanchinne maqire ihimminne usheexxat woronne lossakko'i illi
mare'uwwa fintehe




QAR KOLLO MARE'I FINTO'O

- | | | | |
|-----|---|-------|--------------------------------|
| A. | Mare'oo'm angi qoocci | ----- | Sh/ biddiqaakkoo
angi oobba |
| B. | Mare'oom baxamoo beyyi | ----- | biq illagenne |
| C. | Mare'oo'm angi oobbi duuha'i | ----- | qeddi kollonnee
makkannee |
| Ch. | Mare'oo'm mikmikaat | ----- | illaqqi kollonne |
| D. | Mare'oominne maqire maroo illi
caakkishshii orachchi mikmikaatii | ----- | xiniinso'i ille |


USHEEXXAT HONSO

TIRAAFIIQQI SEERA



Tiraafiiqqi Fooliisa

Seera



LOSA'N BAXXANCHI MATO

LOsixxi Mato

Awwonoo misila ege'lo'inne moo'lakka'a misila moo'imminne laqqak-ko'i qax asso losisaanchina caakkissehe.



MISIL 20

IYYANNABBAAYYI SOGITANO

Iyyannabbaayyi tiraafiiqqi fooliisichcho. Hundammanem neese moo'ee-na waaroo xire tiraafiiqqi seera moo'oo'isinne losano uwwookko. Ixxi kurukkisanne lobakkat manni ballina ballina tiraafiiqqi daafinne letamo. Lobakat mannim dee'uwwi ihaakko. Amaxxi bi'aakko. Iyyannabbaayyi lokki googaanii kaame'e ushe'aanii tiraafiiqqi seera egettota'n ku hawwi qooccamooyyo yaa amma'nookko. Uwwukki losa'n lambe'iinse aw-wontam keen siidamtamo.

1. Lokkinne taakke'nummuuya hundammanem gooqqeka qeddi suum amandaa taakke'noommisa mashka'oomim kaame'uwwi hantululitamokki gooqqekka makki suume amaddatette ihubbikina waaroo kame'uwwa sholl'aallanne moo'neena xansiisookko. Kukim nigaga kaame'i daafiinse ege'linoommisa issookko.
2. Googo mulla hingoom xire hundammanem kaame'i hee'imma bee'imma qoosineena gaasinaa qeddi kolloo makkolloo moo'naa qadaalli haxxar yoo beyyi xale'inne googo mulloommisa.
3. Tiraafiiqqi kashar caakkaa yimmi uulle yimmi ihukkisa, Baar gude yimmi ihukkisa, Shaano'i taakkina eeyyit ihukkisa manni misila moo'isoo tiraafiiqqi ccaakki yoolas misiloom shaano'i hagaranne daba'loo xire xale'e googo mulloommisa. Mancho mo'isoo tiraafiiqqi caakki beebeyyonne kashar caakki caakkaa hantululaan ullita'a lasonne goog hingoommisa.
4. Hantululaa'n googonne mah lellom lellinoombeeisa.
5. Waaybeeqqoomii xanat hofe'n yoo ushe'aan yoo bikkina ushe'aan daafa afisamooyyo yinaa cababinoombee'isa.
6. Saa'linummuuyya kaame'i tiraafiiqqi seera egeroobee'an ihulas qoossiisimma sabulas tiraafiiqqi fooliisina la'isimma oobeelasim taakkoom gatona urakka'a dillimma. Iyyanabbaayyi amm'naxxisanne kakeeno hanqo'isam baxonne hosinsumlas tiraafiiqqi daafina higisamaa uwwamchi gada'i horiyyem hoffane.

Losixxi mato

Sawwite wiixxaachcha

Qanannaaxxi horoor horoor sawwite wixxa'lakka'a ki'nuwwi sawwixxisinne qarxxi beshshuwwina caakkissehe.

Losixxi Lamo

Qananannaaxxi horoor horoor sawwite wixxaa'lakka'a ki'nuwwi saw-wixxisanne qaarxi beshshuwwina caakkissehe.

1. Tiraafiiqqi see'l bikkina sogitano uwwukkok ayyette?
2. Tiraafiiqqi daaf gambayookkok mee-mee'i ballannette?
3. Tiraafiiqqi daafina lob mashka'i maruchcho?
4. Tiraafiiqqi daafina saat te'im hantaar ihooluwwi maruchcho?
5. Lokkinne taakke'noommi xire gooqeka mak kollo amandaa marim hasisoo mahinate?
6. Gogo mulleena gaasinaa egerimmi laboo luwwi maha?
7. Kashar tiraafiiqqi caakki tirat maruchcho?
8. Ushe'aan daafa afisseena xantamo yinaa sawwimmi hasisoo mahina?
9. Saa'linummi kaame'e ushe'aanchi tiraafiiqqi seera higaa moo'num-las maha issimmi hasisoo?
10. Tiraafiiqqi seera egeelumlas daafina biir ihimmi gada'i hiinkaa'na?

Losixxi Saso

Tiyaati'l Hayyo'o

Kashara, Baaraa Shaano'i kaarduwwa awwaaxximminne tiraafiiqqi seera qaarxi woronne losixxehe.

LOSA'N BAXXANCHI LAMO

QAROO'M CAAKKISHSHI MARE'UWWA

Losisaanchinne maqir ihimminne awwonoo kee'n qarooma caakkishsha shiinaatisehe. Illinne moo'lakko'i te'im illi naqaashuwwiinse maccee-sakko'i daafa qarxi beshshuwwina aganna kullehe.

Qarmannano

- 1 Niyyum ma / niyyanni
- 2 Niyyum ma / niyyanniama
- 3 Niyyum ma / niyyanniabbaayyi
- 4 Niyyum ma / niyyannaayya
- 5 Niyyum ma / niyyanni abaroos
- 6 Niyyanni niyyummi abaroosina

Weeshanchi summa

- A. beetare
- B. eeshimma / annabbaayyo
- C. lob ama
- Ch. landichchi aro,o
- D. lob anna
- E. amaayya / ada

LOSA'N BAXXANCHI SASO

Aganna kura

Illinne moo'lakko'i te'im illi naqaashshuwwiinse macceessakko'i daafa qarxi beshshuwwina aganna kullehe.

LOSA'N BAXXANCHI SOORO

MARE'UWWI FINTO'O

Losisaanchinne maqire ihimminne ka usheexxaxxi woronne lossakko'aannika illi mare'uwwa fintehe.

Kobi'lishshina





FOOLIISI MARE'I FINTO'O

- | | | | |
|-----|--|-------|---------------------------------------|
| A. | Mare'oo'm angi qoocci | ----- | qinxukki daaph-
phisaanchi maxxara |
| B. | Mare'oo'm baxamoo beyyi | ----- | qeddi kolli cekko |
| C. | Mare'oo'm angi oobbi duuha'i | ----- | aad |
| Ch. | Mare'oo'm mikmikaat | ----- | biq kollii wororonne |
| D. | Mare'oominne maroo illi caak-
kishshii orachchi mikmikaatii | ----- | mididaakkoo cekko |

USHEEXXAT TOMMO

EGE'LO'O





Ege'limma



Daafa




Hospitaala




Qare'na



Fayya'ooma



elektiriika



giira

LOSA 'N BAXXANCHI LAMO

MOO 'IMMI QANANNAATO

Losixxi Mato

1. Awwonoo misila qoossitakka'a moo'lehe. Misiliinse sawwitakkam luwwa afiseena xanoo daafo massimmi hasisoo ege'limmi hagalluwwa baxxanchi beshina caakkissehe. Caakkissakkeena hassakko'i sawwite caakkishshina hasisoo mare'e laqqakam bee'an ihulas losisaanchiinse hara'mato xa'mehe.
2. Misilanne exxubee'an ihaa mulleka laqqakkam daafo afiseena xanoo luwwi te'im soko'uwwi yoolas losisaanchina caakkissehe.



MISIL 21

LOSA'N BAXXAMCHI LAMO

Losisaanchi awwonoo qanannaato qananaa'lakku'uuyya danaamisa awwonnehe.

EGE'LIMMA

Ki'nuw ga,nanne, baxikaa losa'n mi'n hegeegonnee awwaadoo keeninne hawwodoo luwwinne wo'maakkoothane.

Mat mat awwaadoo luwwoom hanqo'isa awwaaxxinummibeelas hawwojja eebbeena xanttamo. Eebikkina ege'lim hasisookko.

Ni mi'n woronne siidamoo awwaaxxinoommi luwwi woriinse awwonoo keeno ege'linummuuyya

awwaaxxinummi beelas hawwodeena xantamo; Maqulanta, jajjara, barakiina, shuquna bi'isoo qaraare,

sarakko'i iibbaalli muuta, kemikaalluwwa, elektiriiqqi muutaa shibo'oo mk. ni losa'n minenne ubukki

xaalluwwi, shibo'uwwii qorqoro'uwwii ebeeraa tigeena hadashshuk gortanni, qashi te'im shu'm minneewwi, elektiriiqqi muuttuwwii elektiriiqqi shibo'uwwii mk. yookko.

Ni hegeegonne leerukki wo'i ,dambal te'im ageena xanoo daajjuwwi, ifiisanto'i bee'i wo'i balluwwi daafo affisseena xantam hantululluwwi, mi'n diinat, bii'l moochchi, hamashsha sadeent maxxarii eekeeno laboo naasichchii yookki qoocanchuwvim yo'o.

Hundem beyyonnem hawwoddam keen yo'o. Ege'linum beelas fayyaa'oamina naasichcho, Dee'oommaninaa lehinaa biir inkeena xanoommo. Anno'im qaraa'l minenne miqakkam badanina biir ikkamoo amaxximmi binneena xanookkoo.

Nigagam hawwojja afisoo luwwii egerimmii laboo luwwi lambe'enne awwonoo keen siidamtamo. Nigaqqi muccurooma egerimma, ayyi luw-

wam banxaa lasage anga saamuninne anshaqqimmi hasisookko. Intoommi ichchi hurbaaxxi muccurooma egerimma, minennee biirannee

awwaaxxinoommi muuta seeramisinne awwaaxximmi losimmii awwonsi sono'isinne awwaaxxinaa lasage laboo beyyonne dissimma, losamu bee'i daadaano

wwaaxxineena gaassinaa eehanni bikkina caakkisoo hanenne kitaabamukkoka qananaa'imma te'im anno'oo niinnii lobkeeno xa'minaa qoossimma. Minennee biirannee

mikmikinoom xire hasisoo'isinne ege'limmi hasisoothane.

Gaga ege'limminne nigaga daafiinsee anno'om hasisoo bee'i bada'n miqo'ii gatinseena xannoommo. Niyanno'i " Jabbakka'a hawwimmiinse gaassakka'a qoorimma." yitam hanqi yookko.

Losixxi Mato

Awwonoo xa'michchuwwa qanannaaxxisinne qarxi woronne IMS dabballehe.

1. Daafu afisseena xantam luchchi siidamtamokki hannonnette?
2. Daafu afisseena xantam luchhi niminiinsee nihegeegiinsee qeessimma xannoombee'ek mahinatte?
3. Mi'n woronne siidatam keeniinse daafu afisseena xantam kee'neka sas kobi'lishsha uwwe.
4. Ege'linaa awwaaxxinumbeelas daafu afisseena xantam kee'neka sas bax muuta qaddaa'e.
5. Ege'limmi hoongi eebookki hawwiinse hofqaxame qaddaa'e.
6. Nigaqqi minennee biirannee daafiinse ege'limmina issimmi hasisoo keeniinse hofqaxam qaddaa'e.
7. Danaamisa ege'limmiinse siidamoo awwaado caakkissehe.
8. " Jabbakka'a hawwimmiinse gaassakka'a qoorimma." yimmi mayyinda'e caakkissehe.

Losixxi Lamo

Ki'n minennee hegegonnee daafo afisseena xantam luchchina issimmi hasisoo ege'limma qarxi beshshuwwina caakkissehe.

LOSA'N BAXXANCHI SASO

MAE'UWWI FINTO'O

Losisaanchinne maqire ikkakka'a ka usheexxat woronne lossakko'aanni-inse illi mare'uwwa fintehe.

Kb: Ege'limma




EGE'LIMMI MARE'I FINTO'O

- A. Mare'oo'm angi qoocci ----- P
- B. Mare'oom baxamoo beyyi ----- biqaannonne illagenne
- C. Mare'oo'm anggi oobbi duuha'i ----- qeddi kollonnee makkannee
- Ch. Mare'oo'm mik mikaat ----- kululleesa
- D. Mare'oominne maroo illi caak- ----- ii'mi yaakkoo cekko , ille
kishshii Orachchi mik mikaatii ----- deemmakka'a

USHEEXXAT TOMMOO MATO

LUWWI BAXXAMCHA




luwwa + baxamcha = mat luwwi baxxamcha



xaara



fuutto'o



laastiika



haqqa



buchcha



fiita

LOSA'N BAXXANCHI MATO

Losixxi Mato

Hundim amaddakko'i luwwiinse mato doo'litakka'a awwonoo xa'mich-chuwwa IMS daballehe.

1. Amaddakko'i luchchi maruchcho?
2. Amaddakko'i luchchi baxamukkok mahiinsette?
3. Amaddakko'i luchchik awwaad maruchcho?


LOSA'N BAXXANCHI LAMO

Losisaanchchi awwonoo qanannaato qananaa'akku'uuyyya IMS aw-waaxxakkamisa qoosimminne

moo'lakku'uuyya amaxxammi xa'michchuwwa dabattakkeena guddehe.

FIITA DISSAKKAM MUUTA

Mat adil, ad'la'n mi'n woronne mishisoo xaraphpheezi hanenne lombinne afuuraa hee'oo mat buchchinne baxamaakkofiita dissakkam muut hee'ukko.



MISIL 22

Mat balla adi'l landichcho fiita feetta'a issiteena amadda'a fiit woro matto'o. Fiita feettebe'e fiita issakkam muuta abuul woronne uullanne dissito'o.



MISIL 23

Fiita dissakkamok lugumonne yoo buchcha moo'aa gado'innee ceemimminnee moo'ukkuuyya “hinkid shigigaa'oolla, iina lokki yoota'n ka haccanne afuuram hee'ummoyyo.” yukko. Buchchi kaka macceesaa lobakata maala'laa “hooge eesooma ayyet ihummisa lachcha hoonge!” yukko sagara shiqqa'aa.

“Mahaa!” yukko fiita dissakkam muut nadanjjinne, “hinkido'ne'i iggimma. Eese wocukkok! Ihulameense adi'l amaxxi ihummisa waarummokkim adi'l miniinsette ihummisa laqqoo?” “atette bagaan ki ayyoomano xaddittok ana'i igaga qoossaa la'oosmo.” yukko buchchi; “Iqachchona'e. oo-dor baxaanchi massebe'e at iinninne hee'litto. Ababa dissakkam muut nadadaa “An adi'l minenne mishisoo zaraphpheed” hanenne afuuroom lombi muuta; kiinninno'i hacci maqire mah edansookko.



MISIL 24

Wocaahim guulloo'n adi'l landichcho bilbilaantichcho holtu'uuyya la'qqoo'nem lokinne aphphissa'a iiqama xa'ukko. Iiqamcha moo'la 'a ajiifito'o. Nadaanji lobakatinnem kininne xaansita'a buchchi issito'o. "Kalasage iina maham awwaaddooyyo; buchchi hee'litto buchchannem exxe." yita'a lokkinne binnaa'la'a matto'o. Ihukkisa moo'ukkuuy hee'ukki buchchi mishiqaa "Habayyi daba'litaa waattitto!" yukko. Dir buchchanne daba'lukki gaass fiita dissaanchi ixxi gaga maala'laa "adaa'nenne buchchi hee'ummo" yukko.

Losixxi Mato

Awwanoo xa'michchuwa qanannaaxxisinne qarxi wonne IMS daballehe.

1. Mishisoo fiita dissaanchi baxamukkok mahiinsette hee'ukko?
2. Mishisoo fiita dissaanchi buchchi gadukkok mahinat hee'ukko?
3. Buchchi, mishisoo fiita dissaanchio at iqachchona'e yukkuk maahina labissakkamo?
4. Mishisoo fiita dissaanchi gaassi heechchi uulla / hagara labukki gambayyaato caakkisehe.
5. Mishisoo fiita dissaanchi lasaanchonne qoossukki hanqi mah hee'ukko?

LOSA'N BAXXAMCHI SASO

XA'MICHCHA XA'MAKKAMISAA DABAR- AKKAMISAA

Losisaanchi mat losaanchinne maqire awwonoo sawwit dabasaqqamcha IMS daballehe.

Losisaanchi: Losisaanchi xaraphpheed baxamukkok mahiinsette?

Losisaanchi: Xaraphpheed baxamukkok haqqiinsette.

Losisaanchi: Woraqat baxamookkok mahiinsette?

Losisaanchi: Woraqat baxamookkok bura'ii(gaabii) te'im haqqi suburiinsette.

Losisaanchi: Edde'ummi Shuraabbi baxamukkok mahiinsette?

Losisaanchi: Shurraabbi baxamukkok fuutto'iiinsette.

Losisaanchi: I kobe'i baxamukkok mahiinsette?

Losisaanchi: I kobe'i baxamukkok omachchiinsette.

Losisaanchi: Ku shudaqqi baxamukkok mahiinsette?

Losisaanchi: Shudaqqi baxamukkok haqqiinsette.

Losisaanchi: Losisaanchi xaqash lokki baxamukkok mahiinsette?

Losisaanchi: Xaqash lokki baxamukkok xaariinsette.

Losisaanchi: Hacca wixxa'akkam qarcaat baxamukkok mahiinsette?

Losisaanchi: Qarcaat baxamukkok leemiinsette.

Losisaanchi: Minxaaf baxamukkok mahiinsette?

Losaan: Minxaaf baxamukkok aanciinsette.

Losixxi Mato

Sawwite dabasaqqamchi lambe'enne annanni annanni muuttuwwa baxximmina hasisoo muuttuwwa mare'inne moo'issehe.

Kb: haqqa

Losixxi lamo

Lam lam ikkakka'a losixxi matonne lossakko'i xa'michcha xa'mimmaa dabachcha uwwimmaa

shooto'i isimminne amaddakko'i luwwi mahiinse baxamooda'e xa'mam-mehhe.

LOSA'N BAXXANCHI SASO

Losixxi Saso

Losisaanchinne maqire aramtakku'uuyya awwanoo fara'l bon beyyuwwanne wo'mookki mare'uwwa hassehe.

Muuttuwwa	Baxamuk muuttuwwa							
	haqqa	fuutto'o	xaara	laastiika	buchcha	Bura'a (gaaba)	Omach- cho	Aanca
Xorqe'e								
qabatot								
gaabebb								
Heeda								
Jarkana								
gala'aa								
Axaqa								
Maarasha								
Jabana								
Woraqataa								

LOSA'N BAXXANCHI SOORO

MARE'UWWI FINTO'O

Losisaanchinne maqire ka usheexxat woronne lossakko'aaniinse won won mare'uwwa fintehe.


Kb. Awwaado

AWWAAXXEKA MARE'I FINTO'O

- | | | | |
|-----|--|-------|----------------------------|
| A. | Mare'oo'm angi qoocci | ----- | G |
| B. | Mare'oom baxamoo beyyi | ----- | biq illagenne |
| C. | Mare'oo'm anggi oobbi
duuha'i | ----- | woronne |
| Ch. | Mare'oo'm mik mikaat | ----- | woro'l kollonnee biirannee |
| D. | Mare'oominne maroo illi
caakkishshii orachchi mik
mikaatii | ----- | mahim bee'ane |


USHEEXXAT TOMMOO LAMO

GAGA LA'ISIMMA



Gaga

la'simma



LOSA 'N BAXXANCHI MATO

Losixxi mato

Ki'nuwwi losisaanchchi issi heechchi aganna gundanne kurakkona. Losisaanchchi issi gaga caakkisakkeena awwaaxxakko'i mare'uwwa danaamisa moo'lakka'a awwannoo xa'michchuwwa daballehe.

1. Losisaanchchi issi aganna asheerakko'ok mahinnett?
2. Aganni kur woronne beyyo uwwakko'i quuxxuwwi maruchcho?
3. Aganna kur woronne awwaxxakko'i goollaanchi maruchcho?
4. Aganna kurakku'uuy higukkan ihukkisa moo'isimmina awwaaxxakko'i maer'uwwi maruchcho?
5. Issi agannanna hanqatukkok te'im exximmi hasisoo luwwi yoolas caakkissehe?

Losixxi Lamo

Lam lam ikkukka'a losisaanchi inse lossakko'i kob'lishshisinne ki'nuwwi heechchi aganna kurimma losixxehe. Awwonoo losa'n ammanenne losisaanchchi baxxamchi woronne uullitakka'a ki'nuwwi aganna kuttakkona xa'mantakkam bikkina kaba erisa losixxehe. Losixximma guulitakkam xire qarxi beshshuwwi illagenne awwannoo xa'michchuwwa daballehe.

1. Ki'nuwwi beshichchi aganna kur hinkiddet hee'ukko?
2. Ki'nuwwi beshichchi hincite ee'laanchchisa axisoo'isina maha sogakkamo?

LOSA 'N BAXXANCHI LAMO

Losisaanchchi awwonoo aganna qananaa'akkam xire danaamisa moo'lako'uuyya amaxxam xa'michcha daballehe.

DOFFITOCHCHI ANDIRWIU FOSTER (HANQO'I AGANNA)



D/R FOOSTEE'L MARE'I SUMMA

Baxxanchi Mato

Wo'm summi Andirwu Jaksen Foster yamamoommo. Qaramaa Li'umbeyyi hanaa'n Ameerika'i qarannette; Alaabaama yamamoo gassi woronnette Ilob anno'i waato'i beyyo la'umbeeta'nem Iyyanii iyyummaa heemachchi manni ikko'i bikkina igaga Afiriiqqi-Am erkaawekkichcho te'im heemachchi Amerkaawekkichchi issaa xi-goommo. Iyyanni shiinshi maa'idiina fissimminne biinci garaakkoo buxxichcho. Li'umokk shiinsha fissakkam mat las gat beero'nette. Oosoomaninnem axo bajjaa'oo jabbi amaada macceesimmi qeddi yoomanchi ihummo.



D/R ANDIRWU FOSTE

Sadeenti baxxanchi afeebe'e losummok Alaabaa macceesh qeddi yookee'n losa'n minennette. Buxichchoo heemachcha iha ihiminne losa'n gada'i xuqqi hee'ukko. Geej manchi ihimmi haqaawwi yoobikkina annanni annanni baxo baxummuuyya iixxe'i losa'n mi'n losano losimma asheerummo. Ee diinate (bira) siixxeena amaxxamum baxxuwiinse mat

iiyyiisoo kame'e ushechchi hee'ukko. Dadda'l mixxeechi iheena hiim hiimo dadda'l bax kolleejjanne aagaa losaammo. Qee'l asse'amchi losano losummuuyya la'm gaba'l losano guullummisam heer uullaanne luxxi gaba'l kolleejja (ka Unverste'i ihaakko) ihukki Gilawudet kolleejja aagummo. Losanonne qoxxachchi ihum bikkina onti hiinchi losano guullaa digire'e aa'ummok sas hiinchonnet hee'ukko.

Mat Afriiqqi woronne annanni annanni dee'oom yoo oso losisseena xantam losa'n minneew tommoolam xale'i ihukkisa qananaa'aamma lobakata kichche'ummo. Lobakata swwaa lasage Afriiqqi uulla waara macceeshshi qedi yookee'n losa'n mine fooqaa'immi hasisaa yaa muratonne afummo. Igaga gudixxeena gaas Michgaa'n Unveriste'e aagaa losimmina dee'oo'm losaninne masters digire'e aa'ummo.

Gaga gudixxaa lasonne Afriiqqi uulla waara yakummaarem lobakat qolattuwwi gamba'uko. Heemachcha macceesh qediyoohanee ihmminne asse'ammaano Afriiqqi uulla asse'lam xaaxxittuwi hundim eese taqeebalt'o. Eelasage mannim ka sawwite uroommisa sogukko. Kak tungiseena Kristi'aan Mishiin Foorz Deef yamoo igaqqan ihaakko xaaxxite uullisaa maaja wixxaa'imminne E.U.X 1956 isawwixxeka beyyo afiseena Afriiqqi uulla waarumo.

Losixxi Mato

Losisaanchi agannikka la'm baxxancha qananaa'akko'o'n illaage haanaan hincukki aganna kinuwi gaqqi caakkishinne Hinkaa'na laqqakkoda'e moo'isse.

Losixxi lamo

Qanannaaxxisinne awwonoo xa'michchuwwa qanannaaxxi woronne IMS daballehe.

1. Fooster Andirwu qaramu beyyi hanno?
2. Fooster anni heechchina ihoo siixxo'i mah hee'ukko?
3. Fooster macceeshi qeddi hee'oo'isa issukki jabi maruch?

4. Fooster luxxi gabala losuk losa'n mi'n summi aye yamamoo?
5. Fooster baxukki baxxuwwi maruchcho?
6. Fooster la'm gaba'l losano awwonukkis hinkidet hee'ukko?
7. Fooster luxxi digire'e guleena mee'i hiinchcho massukko?
8. Fooster maasteersa aa'eena losukkok hika'i losa'n shogannette?
9. Fooster Afriiqqi uulla waarona ki'isansuk luwwi maruchcho?
10. Fooster Afriiqqi uulla waarukkok mee'i haafixxi doolennette?

LOSA'N BAXXANCHI SASO

Losisaanchi D/r Andirwu Foosteka aganna te'im la'm baxxancha qanaana'akkam xire ege'lo'nne moo'lako'uuyya edamchi yoo xa'michchuwwa daballehe.

D/r Andirwu Fooster (hanqo'i aganna)

Baxxanchi Lamo

Afriiqqi uullanne gaassaa afum beyyi ga'n eeliinchi aaggi qaranne siid-
amta Gaana yamantam ga'n hee'ukko. Mat uunxxax minenne gooto'i
minchcho uunxaa tommoolam macceesh qeddi yoo ooso wixxaa'aa afri-
iqqanne luxxan ihaakkoo losa'n mine fooqqaa'ummo. Mare'i suume Af-
riiqqi uullina eebummok anette hee'ummo. Losisimma asheerumokkim
anette he'ummo. . Losisimma asheerumokkim anette ihummuuyya luxxi
losanim mare'i suume hee'ukko. Oosim mare'i suume lossa'a wocimmaa
lellimmaa ashetta'a lobakata liramto'o. Anim lobakata liiramummo. Aw-
wanaa Nayijeeri'a yamantam eeliinchi aag kollonne mulli uulla maaraa
mulli maacceesh qed yookee'n losa'n mine fooqqaa'ummo. Eelasag an-
nanni annanni Afriiqqi uullanne daba'lamummuuyya losa'n minneewwa
fooqqaa'ma asheerummo.

Afriiqqa waroomaare macceeshi qeddi yookeeno losisimmina duuha'i
makkukkoy hee'ukko. Lobakat manni macceeshi qedi yookeeno duun-
cha, macceeshi qedi yookeeno losseena xantamoyyoo yamaa ama'namoo

bikkina macceeshi qedi yoo oos abaroos maaxxam hee'lo'o. Losa'n mine aaggona hassam hee'loyyo. Marum ulli hundannem Kido'ne'i sawwite dabareena lobakata yakite issaammo.

Sadennee mat hiinchi woronne tommonnee sas uullannee sadii hanaan ihaakko los'n minneewwa fooqaa'imminne lobakat kum macceeshi qedi yoo oosina losano gudda'a siixxitamisa issaammo. An losa'n gada'a qoocummi keen macceeshi qedi yookeen Afriiqqi uulli oosik mat mat keen Ameerika'i Unveriste'i woronne Profeseelluwwa. Itophphe'en-nem losa'n mine fooqaachchi neeyyat yoobikkina E.U.X 1978 waaraa hee'ummo. Mulli Amerika'i uulli manni losa'n mine fooqaalo'i bikkina losa'n mine fooqaachcha uraa keemaalisa macceeshi qedi yooke'neka onti Itophphe'i ooso Naayijeera'a massaa amma'nato'i lossamisa issummo. Afriiqqannem issum eroom bax awwaado moo'uk unveriste'i lombi doftorooma iina uwwukko. Eebikkina an la'amoommok

D/r Andiriwu Foster yamamchinnette.

Losixxi mato

Losisaanchi awwonoo xuunsam woccuwwa IMS qananaa'akkamaare qanannaaxxisinne hanqika te'im qophpha'n mare'e awwaaxximminne daballehe.

1. D/r Fooster Afriiqqi uulla waarakko'uuyya luxxeka mrakko'okka Nayijeera'i hee'ukko?
2. D/r Fooster fooqa'akko'i luxxi losa'n min mishisoothane haraa hee'ukko.
3. D/r Fooster losa'n min asheerukkuuyya losaan xig lamiyyii hanaan he'ukko.
4. D/r Fooster losaanina uwwakko'i luxxi losan mare'i suume hee'uko.
5. D/r Fooster Gaana'a marakka'a lasage Laybeera'a marakka'a hee'ukko.
6. D/r Fooster Itophphe'i woronne losa'n mine fooqa'akko'ookko.

7. D/r Fooster Afriiqqi woronne sadii hanaan losa'n mine fooqa'akko'ookko.
8. D/r Fooster Afriiqqi uullanne macceesh qedi yookeenina losisimmina duuha'i hundim makki hee'ukko.
9. D/r Fooster Itophphe'i ooso hara'mimmina yakite isakko'oyyo.
10. D/r Fooster kabadem foorinne yoomakke'e.

Losixxi Lamo

Losisaanchi awwonoo xuunsam woca IMS qananaa'akkamaare macceesakka'a bon beyyuwwanne wo'mimmi laboo mare'uwwa laqqakkamlas anga ki'isakka'a moo'issehe.

1. _____ anni shiinshi ma'iddiina hinaanchi hee'ukko.
2. D/r Fooster _____ Ameerkawekkichcho.
3. D/r Fooster abaroos heemachchaa _____ hee'amukko.
4. D/r Fooster lehakko'ok _____ daafonnette.
5. D/r Fooster hundem Afriiqqi uullanne losa'n mine fooqqaachchi _____ hee'ukko.
6. D/r Fooster issakko'i bax awwaado moo'ukki Unversitte'i _____ Doftorooma uwwakko'o.
7. D/r Fooster onti Itophphe'i ooso _____ masimminne losisakko'ookko.
8. D/r Fooster shole'aalisinne _____ manchi hee'ukkoyyo.
9. Issi heechchi doolenne D/r Fooster _____ losa'n mine fooqa'akko'ooko.
10. D/r Fooster ka uulliinse _____ annanni ihakko'ok 1987H.D.

LOSA 'N BAXXANCHI SOORO

FITO

Losixxi Mato

Lam gaalchchi lambe'enne Toomas Ediiseenekaa D/r Fooster baxo maceeshi qeddi yookeenina lophphook awwaad yookkok hinkannonnet ihukkisa fitammehe. Losisaanchim misha uwwakkamo.

Losixxi lamo

Kabad afeebe'e lossakko'oka shooto'i isimminne ki'nuwwi heechqaanqa qarxi beshshuwwina aganna kullehe.

LOSA 'N BAXXANCHI LAMO

MAE'UWWA FINTIMMA

Losisaanchchinne maqire ikkaka'a Ka usheexxat woronne losakko'aanika won won mare'uwwa fintehe.

Kobi'lishshina:

KIGAGA



KIGAGA MARE'E FINTE

- A. Mare'oo'm angi qoocci ----- A
- B. Mare'oom baxamoo beyyi ----- biq hanenne
- C. Mare'oo'm anggi oobbi duuha'i ----- woro'l kollonne
- Ch. Mare'oo'm mik mikaat ----- biirii woro'l kollonnee
- D. Mare'oominne maroo illi caak-
kishshii orachchi mik mikaatii ----- lasaqqi kollonne
hixxixxakka'a